

四庫全書

史部

欽定四庫全書

史部

山西通志卷十四

詳校官監察御史_臣查善長

檢討_臣德生覆勘

總校官進士_臣朱鈐

校對官編修_臣勵守謙

謄錄監生_臣蔣繼煥

欽定四庫全書

山西通志卷十四

關隘

六

澤州府

鳳臺縣

橫望隘南八十里太行絕頂南距河內縣碗子城一十里明洪武二年置巡檢司橫望隘以狄梁公望雲名郭璞注太行山在今河內縣西北即治所轄地

索隱太行山在河內山陽縣西北 磨盤砦州南

六十里一名孟浪砦 將軍砦宋岳飛為張所部將
復新鄉轉戰大捷後梁興渡河會太行忠義亦敗敵
於沁水築砦以待飛 戰國策北塹太行之道則上
黨之兵不下又曰左右孟門羊腸在其南盧澤在其
北正義南陽屬韓秦攻之則韓太行羊腸道絕矣括
地志太行山在懷州河內縣北二十五里有羊腸坂
元和志太行陁在懷州北濶三步長四十里羊腸所

經瀑布懸絕實為險隘正義又曰羊腸太行山坂道
名南屬懷州北屬澤州今自碗子城南長平鋪至新
店自星軺驛北至河底皆所謂羊腸坂也魏武帝苦
寒行北上太行山艱哉何巍巍羊腸坂詰屈車輪為
之摧李白詩五月相呼度太行摧輪不道羊腸苦羊
腸坂當以碗子城橫望嶺為正而正義又曰沁州在
羊腸坂之西是指壺關羊腸坂也若陽城東六十里
羊腸坂交城羊腸山行旅絕少不得附虞坂隴坂九

折坂之例 唐會昌三年八月劉稹使牙將薛茂卿
自太行南下拔河陽科斗寨距懷州十餘里九月李
德裕請以王宰兼河陽行營招討使使亟以軍援河
陽兼臨制魏博又奏河陽節度先領懷州刺史常以
判官攝事割河南五縣租賦隸河陽不若遂以五縣
置孟州其懷州別置刺史俟昭義平日仍割澤州隸
河陽則太行之險不在昭義而河陽遂為重鎮東都
無復憂矣乃以敬昕為河陽節度王宰將行營以扞

敵所供饋餉按明初晉豫分境碗子城隸河南橫望
鎮隸澤州而小口亦半隸河內亦即德裕割澤州隸
河陽之意於以見太行為晉疆第一門戶

碗子城南九十里太行絕頂羣山迴環兩崖夾立中建
小城隱若鐵甕即宋太祖負石地也明正統間寧山
衛指揮胡剛鑿石平險車騎差可通焉 碗子城關
羊腸所經 碗子城懷慶城北太行山頂其路羊腸
百折中有平地僅一畝唐初築城控懷澤之衝其城

甚小故名 碗子城山在懷慶府城北五十里山險峻其形如碗上有古城 宋太祖親征李筠山路險峻多石不可行太祖先於馬上負數石羣臣六軍皆負之即日平為大道 元太宗二年十二月太宗以中軍自碗子城南下渡河繇河陽進 金貞祐元年元遣將自碗子城南下渡河 元至正十八年曹濮賊王士誠等上太行陷晉寧路平章政事察罕特穆爾大敗之分兵屯澤州塞碗子城 明洪武元年八

月壬申平章楊璟至太行碗子城破其關癸酉澤州
守將賀宗哲遁 王世貞馮勝傳從大將軍達下山
西從武陟取懷慶踰太行克碗子城取澤州遂取潞
州

天井關南四十五里太行絕頂 星軺驛北十五里

唐志晉城南有天井關一名太行關 通典晉城有
天井關在縣南太行山上關前有天井泉三所 通
典關南有大井泉三今謂之百巖可容百家關在井

北故又曰百家 戰國策樂之居左天門之險右天
溪之扼 羅泌路史帝履癸始遷於上黨之垂羅草
注所謂天門在澤之晉城太行之上有天門 漢建
武二年遣司空王梁北守天井關擊赤眉 漢馮異
攻天井關拔上黨兩城 宗正劉延攻天井關上黨
太守田邑拒之 唐河陽節度使王茂元別遣將營
天井關為賊將薛茂卿所破執四將火十七柵張巨
進攻萬善不能下茂元欲走會日暮賊自潰去詔忠

武王宰以本軍入懷澤行營陳許士剽武賊衆素憚
畏而茂卿負戰勝冀厚賞或言其兵犯王略深朝廷
且怒節益不可至劉稹然之故茂卿失望乃與宰通
十一月偽挑戰亟北委天井關去左右七營皆潰宰
遂焚大小箕村茂卿奔澤州使諜言於宰曰澤可取
吾應於內宰疑不進失期茂卿扼腕悵恨稹聞其貳
名殺之 會昌三年十一月戊辰招討使王宰進攻
澤州與劉公直戰不利公直乘勝復天井關甲戌宰

進擊公直大破之遂圍陵川克之杜牧上李司徒
澤潞用兵書河陽西北去天井關強一百里關隘多
山井不可鑿雖有兵力必恐無功若以萬人為壘下
窒其口高壁深塹而與之戰忽有敗負勢驚洛師
天復元年梁遣氏叔琮攻晉出天井關昭義節度使
孟遷降金宗翰趨汴使羅索等自平陽先趨河南
曰若至澤州與薩里博勒和實實遇當與俱進錫實
之前軍三穆昆敗宋兵三千於襄垣遇伏兵二千又

敗之薩喇達破天井關又破步兵於孔子廟南遂降
河陽 正大四年元穆呼哩攻天井關人民逃匿山
澤 天井溪縣南四十五里天井關注合白水回車
轍南四十五里天井關古建回車廟

柳樹隘東南八十里路通清化鎮明置巡檢司 柳樹
店繇鐵樑山西十八盤至柳樹店又東北至陵川奪
火店 魏永安三年僕射爾朱世隆自河橋北遁詔
行臺源子恭鎮太行谷築壘防之 明崇禎五年

流賊紫金梁老獾在河北修武為官兵追剿遂踰太行自柳樹口至陵川南馬附城

小口碗子城西繇西梁別徑入山至星軺驛南一十三里會大同 隋大業中上登太行山別開道九十里以達河內御史大夫張衡宅悅其林泉留宴三日即今小口道也

馬牢關梁遣李謹攻李罕之于澤州晉遣李存孝以騎兵五千救之梁驍將鄧季筠出戰存孝舞稍擒之李

謹敗走追擊至馬牢關 馬牢川南二十里

緝麻背金正大九年破魯都尉烏凌阿呼圖據少室太
平頂御寨招澤人緝麻背武錄事等二十餘人起汴
攔車鎮 雍正五年設把總一員澤州府同知駐劄
金志晉城鎮二周村巴公舊又置星軹鎮

武靳關地形志陽阿有武靳關

巴公原北接高平 周村西接陽城 黨莊東接陵川
河底天井關北山至河底漸平

高平縣

長平秦壁在城西

正義秦壁一名秦壘今亦名秦長壘

周赧王四十七年

秦使左庶長王齕攻韓取上黨上黨民走趙趙軍長平以按據上黨民四月齕因攻趙趙使廉頗將趙軍士卒犯秦斥兵秦斥兵斬趙裨將茄六月陷趙軍取二鄴四尉七月趙軍築壘壁而守之秦人攻其壘取二尉敗其陣奪西壘壁廉頗堅壁以待秦秦數挑戰趙兵不出趙王數以為讓而秦相應侯又使人行于

金於趙為反間曰秦之所惡獨畏馬服子趙括將耳
廉頗易與且降矣趙王既怒廉頗軍數敗反堅壁不
敢戰又聞秦反間之言因使趙括代廉頗將以擊秦
秦聞括將乃陰使武安君白起為上將軍而王齕為
尉裨將趙括至出兵擊秦軍秦軍佯敗而走張二奇
兵以劫之趙軍逐勝追造秦壁壁堅拒不得入而秦
奇兵二萬五千人絕趙軍後有一軍五千騎絕趙壁
間趙軍分而為二糧道絕因築壁堅守

正義趙壁今
名趙東壘亦

名趙東長壘在澤州高平縣北五里即趙括築壘自敗處

以待救至秦王自之河

內賜民爵各一級發年十五以上悉詣長平遮絕趙救及糧食至九月趙卒不得食四十六日皆內陰相殺食來攻秦壘不能出其將軍趙括出銳卒自搏戰秦軍射殺趙括括軍敗卒四十萬人降秦白起計曰前秦已拔上黨民不樂為秦而歸趙趙卒反覆非盡殺之恐為亂乃挾詐而盡坑之遺其小者二百四十人歸趙前後斬首虜四十五萬人趙人大震四十八

年十月秦復定上黨郡司馬梗定太原 上黨記長
平城在郡南秦壘在城西二軍共食流水澗相去五
里秦坑趙衆收頭顱築臺於壘中因山為臺崔巍築
起今仍號曰白起臺城之左右沿山亘隰南北五十
許里東西二十餘里悉秦趙故壘遺壁舊存焉 綱
目質實長平故城在縣西北二十里即秦白起破趙
括處 坑卒考趙括追造秦壁即今之省冤谷是也
其谷四圍皆高山聯絡前有一路僅容車馬形如布

袋趙兵既入戰不利築壁堅守秦因建空倉於西山以給趙軍趙軍欲出不得拈自出搏戰秦射殺之卒四十萬人解甲降武安君誘入谷口盡坑之考邑坑卒之處故城在縣西北二十里王報等村俱是其遺蹟見山川古蹟

省冤谷西北二十里即秦坑趙卒處舊名殺谷唐玄宗幸潞過此改曰省冤 金王庭直省冤谷記城西北十五里有地曰殺谷乃秦將白起坑趙卒之所細視

其跡於長脰骨間存銅漆矢一入骨寸餘因出矢而
揜之

白起臺縣西六里髑髏山白起所築以覘趙軍 頭髏
山縣西南五里秦白起坑趙降卒四十萬唐玄宗命
收頭髏葬於此建髑髏廟有司春秋祀之

空倉山西南四十五里白起詭運米置倉於此以紹趙
拓新建巡檢司城

大糧山東十里趙將廉頗積米於此又名米山中多邃

谷積雪春暮不消

營防嶺東十里傳為廉頗屯軍之所背峰面澤有險可
憑去嶺百步許有古戰場

金門山北五里當壘之門

光狼城秦白起伐趙取代光狼城括地志光狼故城在
澤州高平縣今名強營村 史記白起攻趙拔光狼
城今聚落尚以秦趙二城為名

故關城北二十五里秦時置後廢今其里尚名故關

長平城西北二十一里北齊置長平郡尋廢後漢志注
泫氏有長平亭史記曰白起破趙長平上黨記曰白
城在郡南山中百二十里長平秦壁 晉永嘉三年
東海王司馬越遣淮南內史王曠將軍施融曹超等
將兵拒劉聰曠既濟河欲長驅而前融曰彼乘險間
出我雖有百萬之衆猶是一軍獨受敵也且當阻水
為固以量勢形然後圖之曠怒曰君欲阻衆耶融退
曰彼善於用兵曠闇於事勢吾屬今必死矣曠等踰

太行與聰遇戰於長平間曠兵大敗融超皆死遂破
屯留長子斬獲萬九千級上黨太守龐淳以壺關降
長平關即江緒嶺西北四十里長子縣界江緒即丹朱嶺唐志
北有長平關 隋仁壽四年十月丙申詔發丁男數
十萬掘塹自龍門東接長平汲郡抵臨清關度河至
浚儀襄城達於上洛以置關防

高平南高原周顯德元年二月北漢劉旻攻潞州三月
乙酉世宗如潞州以攻漢壬辰次澤州閱兵於北郊

癸巳及劉旻戰於高原敗之追及於高平又敗之丁酉幸潞州己亥侍衛馬軍都指揮使樊愛能步軍都指揮使何徽伏誅 正月丙申世宗即位劉旻遣使

於遼二月遼遣武定節度使政事令楊衮

遼史政事令耶律敵

將鐵馬萬騎及奚諸部兵五六萬人號稱十萬來會於晉陽旻自將兵三萬以白從暉為行軍都部署張元徽為前鋒都指揮使與遼兵南出團柏丁巳屯梁侯驛周昭義軍節度使李筠遣牙將逆戰於太平驛

張元徽斬昭義將穆令均筠遁歸上黨三月旻兵逼潞州引而南世宗曰劉旻少我謂我新立而國有大喪必不能出兵且善用兵者出其不意吾當自將擊之馮道等諫怒卒自將擊旻癸巳前鋒與旻兵遇於高平南之高原旻兵少却諸軍亟進旻以中軍陳於巴公原張元徽居東偏楊衮居西偏周師亦列為三陣李重進白重贊將左樊愛能何徽將右向訓史彥超居中央張永德以禁兵衛帝帝介馬自督戰衮望

周師曰勍敵也未可輕動旻奮髯曰時不可失請公勿言袞怒而去時東北風方盛俄而遽轉南風旻副樞密使王延嗣使司天監李義白云時可戰矣旻號令東偏先進王得中叩馬諫曰義可斬也南風勢急非北軍之利宜少待旻怒即麾元徽戰元徽擊右軍兵始交周樊愛能何徽引騎兵先遁右軍潰步卒數千人棄甲降旻元徽呼萬歲聲振川谷周兵大駭帝赫怒躍馬入陣引五十人直衝旻之牙帳旻方張樂

飲酒示閒暇及周兵奄至驚惶失次帝親犯矢石督戰士士奮勇爭先馬仁瑀馬全义及永德等直前是趣元徽進兵會元徽馬躡為周兵所殺是軍氣奪是自麾赤幟收軍軍驟退不能止互相蹂躪遂大敗日暮收餘兵萬人阻澗而守是時劉詞將周之後軍戰已勝而詞軍繼至復乘勝擊是兵延嗣戰死是又大敗輜重器甲乘輿服御皆為周所獲丁酉帝至潞州是自高平被褐戴笠乘契丹所贈黃騾率百餘騎繇

鵬窩嶺間道驅去夜失道山谷間得村民為鄉導誤
趣晉州行百餘里乃覺遂殺導者晝夜兼行所至得
食未舉箸或傳周兵至輒倉皇而去旻衰老力憊伏
馬上馳驟殆不能支僅得循他道以歸是役也衮畜
怒按兵西偏不戰故獨全軍而返周世宗戰場南
三里橫澗橋外周世宗敗劉旻於此因名輸場方
輿勝覽四面皆山中有平地曰高平平地乃古戰場
也

石壁關東二十里魏莊西大石坡

空倉山巡檢司西南四十五里接沁水界

縣志右阻倉嶺明萬

曆三十四年知州賀盛瑞知縣劉應名以空倉兩壁
高山中通小徑請立石城一座寧旅來遠二墩防夫
三十名以時巡徼賀盛瑞空倉嶺堡記高平沁水
之界有嶺曰空倉勢迫兩山之間中通一線之路

米山鎮堡東十里劉龍米山鎮修垣墻記高平之東
南十里許有鎮曰米山居民稠密猶一邑然當澤潞

之衝商賈輳聚百貨咸集

馬村鎮堡西三十里 周纂鎮堡西四十里 寺莊鎮
堡北二十里 換馬鎮堡北四十里 野川鎮堡西
二十里 丁壁鎮堡南三十里 王井堡南十里
趙莊堡北四十里 建寧鎮東四十里 唐安鎮西
三十五里

陽城縣

鐘鼓山西南一百里雲濛山西垣曲縣界 周建德五

年鄔氏公尹昇步騎五千守鐘鼓鎮

傳齊嶺西北七十里沁水縣界 文獻通考齊子嶺今

王屋縣東二十里周齊分界處 魏正光後汾州吐

京胡復鳩集北連劉蠡升南通絳蜀凶徒轉盛以聞

喜裴慶孫為別將從軹關入討至齊子嶺東賊帥范

多范安族等率衆來拒慶孫與戰斬多首 齊神武

圍玉壁別令侯景趣齊子嶺建州刺史楊欒時鎮車

箱悉入寇邵郡率騎禦之景聞欒至斫木斷路者六

十餘里猶驚而不安遂退還河陽 周建德五年大將軍韓明步騎五千守齊子嶺

皂軍塚口東南八十里 孤山東南八十里環萬山中孤峰突兀旁有聚落為皂軍口要衝河內濟源入陽城之阨也 青蘿河經皂軍塚西入濟源 周建德四年七月將攻河陰命梁國公侯莫陳芮率衆一萬守太行道

荆子隘南八十里路通濟源明以懷慶衛官兵守之

屯城東北三十五里秦白起置兵於沁河濱北為武安
南為屯城左山右澤險固可憑 武安村沁水縣東
一百三十五里 明崇禎五年九月流賊自武安犯
縣東客將吳開先敗績於北留死之賊趨澤州

麻婁寨南四十里麻婁山有東西中三峰相距四五里
實不聯屬山勢尖拔 小寨山東南五十里勢極高
聳沁水東繞有鳥道裁可容步 蒸餅洞在麻婁山
南石壁百丈有奇梯而上中袤百步有奇後有泉可

飲數百人昔人作板橋三十隔今圯 順治六年七月潞安賊喬炳許守信投賊張斗光於陽城麻婁寨後走西安

王村堡 下孔堡 北留堡 屯城堡 沁渡堡 上
佛堡 潤城堡 劉善堡 王曲堡 美泉堡 北
安陽堡

陵川縣

五度關南八十里路通修武輝縣舊志五度之險一夫

可守明初以寧山衛官兵守之後罷

永和隘南六十里路通修武縣明初設巡檢司後裁調
寧山衛官兵守之後復罷 唐討劉稹詔忠武節度
使王宰以兵出魏博趨磁州何弘敬即引軍濟漳水
宰相李德裕言河陽兵寡以忠武為援既以杆洛則
并制魏博遂詔宰以兵五千推鋒兼繞河陽行營進
取天井關賊黨離沮德裕以宰乘破竹勢不遂取澤
州以其子晏寶守磁為顧望計詔切責宰懼急攻陵

川破賊石會闕進攻澤州其將郭誼殺稹降 按此

石會即永和隘也

秦嶺西北三十里長子界傳為秦始皇築塞地

詳長子縣嶺即

寶應山也

寶應山西北四十里疊嶂層巒時有雲棲其上

山半有古洞

九仙臺西南六十里石臺突起高數十丈上廣下狹攀援而上 金志陵川有太行山九仙山南九十里修武界望仙樓言望九仙臺也 順治六年七月十一

日潞安賊沈烈郭天祐奔往九仙臺

王莽臺東南一百二十里輝縣界晉疆東南極境

一名王莽

嶺

馬武京砦東五十里馬武山周圍百里四壁峭立漢馬武築砦屯兵於此土人名馬武砦山陰積雪經暑不消東接河南輝縣石門店至輝縣治一百三十餘里金興定四年上黨公張開駐兵馬武山

天柱山東八十里山麓至輝縣五十五里

古賢山西南七十里西通鳳臺南通修武

附城鎮南四十里 池下鎮 楊村鎮 南馬鎮 路

城鎮

沁水縣

東塢嶺西北四十五里與西鳥嶺對峙西鳥嶺隸翼城縣 唐會昌三年石雄代李彥佐之明日率兵踰鳥嶺破五寨即此嶺也地為潞澤平陽界 明宣德四年置巡檢司

國朝設東塢嶺營

詳翼城

雍正七年巡檢司移駐端氏鎮

而東塢嶺營撥頭目防兵以時巡徼

嶺上四時常有雲氣梅河源

出東塢嶺東澗杏河源出東塢嶺南澗

東塢嶺駐防王寨鎮王寨鎮

西至東塢嶺十五里東南至夫妻嶺四十五里夫

妻嶺東至林村嶺五十五里林村嶺至端氏鎮二

十里端氏鎮至玉溪汛四十里

端氏鎮東九十里雍正七年巡撫覺羅石麟題端氏

鎮離縣甚遠又為長子高平鳳臺陽城諸縣往來必

由之道實係山岔要路請移東塢嶺巡檢於鎮以資
彈壓巡緝奉

音允行 崑山榑山東西相望沁河繞其中崑山西數
里濱於沁河為端氏鎮 端氏砦 路史端氏澤之
屬縣西北三十里有端氏故城 通典端氏七國時
韓趙魏分晉封晉君於端氏也漢為縣故城在今縣
西通考同

武安鎮東一百三十五里秦白起侵趙屯兵於此故壘

尚存

郭壁鎮東一百三里沁河經鎮東入陽城界 郭壁大
砦陳杜諸賊焚毀南砦北砦尚存

老馬嶺東一百五十里空倉嶺北商旅通衢山巖竄僻
上設防兵 秋峪嶺東一百六十里高平界在老馬
嶺北路出老馬秋峪之間

祥公嶺東北二百一十里長子界 東倪村東北二百
七十里 西倪村東北二百八十里 十里村東北

二百九十里

固鎮西三十里 唐澤潞高文端言固鎮寨四崖懸絕
勢不可攻然寨中無水皆飲澗水在寨東南約一里
許宜令王逢進兵逼之絕其水道不過三日賊必棄
寨遁去官軍即可追躡前十五里至青龍寨亦四崖
懸絕水在寨外可以前法取也其東十五里則沁城
李德裕奏請詔示王逢

中村鎮西七十里 東塢嶺營撥兵巡緝

大將村北九十里岳陽界沁河縣村入境

竇莊堡東一百里榼山下 卧牛山東為文筆峰又東
數里三峰並列而竇莊在其下 堡東濱沁河明天
啟時兵部尚書張五典築 崇禎四年七月甲午賊
趙四兒六千餘人東渡山西總督洪承疇等兵逐之
賊入沁水縣縣東北有竇莊故張忠烈銓里居也先
是銓父尚書五典築牆為堡甚堅至是賊犯竇莊五
典已歿銓子道濟道澤俱官京師唯銓妻霍氏守舍

衆議棄堡去霍氏語其少子道澄曰避賊而出家不
保出而遇賊身更不免等死耳死於家不愈死於野
乎且守堅賊必不得志躬率童僕為守禦賊至環攻
之堡中矢石並發賊傷甚衆越四日乃退具避山谷
者多遇賊被殺惟張氏宗族得全冀北兵備王肇生
表其堡曰夫人城 六年擊賊於長子賊轉沁水犯
竇莊

辛家河 道仁村 老母掌 西倪村 固鎮村

蒲州府

永濟縣

風陵關南六十五里黃河北岸趙村南通潼關唐大厯
初置明洪武八年設巡檢司屬潼關衛

國朝雍正七年巡撫覺羅石麟巡察宋筠題風陵渡
巡檢司向隸潼關衛而駐劄蒲州地方今潼關裁衛
改縣俸工亦歸併潼關縣是巡檢業隸陝省恐晉省
不能責其效用矣請令駐劄渡口兼隸兩省盤詰奸

允料理濟渡奉

旨允行 風陵坡 唐志河東有風陵關大厯元年置

通典河東有風陵堆與潼關相對 元和志風陵

堆山河東縣南五十里與潼關對 太平寰宇記風

陵城在其下閿鄉津去縣三里即風陵故關也 縣

志風陵在縣南風陵鄉以風后塚名 舊唐書天寶

十一載六月閿鄉縣黃河中女媧墓因大雨晦冥失

所在乾元元年六月瀕河人聞有風雷曉見其墓湧

出上有巨石石上有雙村時號風陵堆女媧亦風姓
水經河水又南至華陰潼關渭水從西來注之河
水歷船司空與渭水會注河在關內南流潼激關山
因謂之潼關河水自潼關東北流水側有長坂謂之
黃卷坂傍絕澗陟此坂以升潼關所謂沂黃卷以濟
潼矣歷北出東崐通謂之函谷關也遼岸天高空谷
幽深澗道之峽車不方軌號曰天險故西京賦曰巖
嶮周固衿帶易守所謂秦得百二并吞諸侯也是以

王元說隗囂曰請以一九泥東封函谷關郭緣生記
曰漢末之亂魏武征韓遂馬超連兵此地今際河之
西有曹公壘道東原上云李典營義熙十三年王師
魯據此壘西征記曰沿道逶迤入函路六里舊城城
周百餘步北臨大河南對高山姚氏置關以守陝宋
武帝入長安檀道濟王鎮惡或據山為營或平城結
壘為大小七十營濱帶河嶮姚氏亦保據山原阜之
上尚傳故跡闕之直北隔河有層阜巍然獨秀孤峙

河陽世謂之風陵戴延之所謂風埵者也南則河濱
姚氏之營與晉對岸秦取魏蒲阪晉陽封陵索
隱紀年作封谷括地志封陵在蒲州漢建安十六
年三月馬超韓遂楊秋李瑞成宜等屯潼關曹操敕
諸將關西兵精悍堅壁勿與戰秋七月操西征與超
等夾關而軍操急持之而潛遣徐晃朱靈等夜渡蒲
坂津據河西為營操自潼關北渡未濟超赴船急戰
校尉丁裴因放牛馬以餌超軍超軍亂取牛馬操乃

得渡循河為角道而南超等退拒渭口 晉義熙十
三年二月冠軍將軍檀道濟渡河使建武將軍沈林
子攻并州刺史河東太守尹昭於蒲坂不克時武衛
將軍姚驢與昭為表裡之勢夾攻道濟道濟深壁不
戰林子曰蒲坂城堅池濬非旦夕可拔攻之則傷衆
守之則引日不如棄之先事潼關潼關天阻形勢之
地且王鎮惡孤軍勢危力寡若使姚紹據之則難圖
矣及其未至當并力爭之若潼關事捷昭可不戰而

自服也道濟從之三月棄蒲坂南向潼關秦撫軍將軍東平公姚讚屯河上以斷水道遣恢武將軍姚難運蒲坂穀以給軍士至香城沈林子擊敗之讚單馬奔還定城時秦河北太守薛帛據河曲以叛黃門侍郎和都討之聞晉師之要難也兼道赴救未至而難敗因破裕別將於河曲遂屯蒲坂七月辛亥劉裕次於陝城辛丑至潼關以寧朔將軍朱超石為河東太守使與振武將軍徐猗之會薛帛於河北共攻

蒲坂秦鎮東將軍平原公璞黃門侍郎姚和都擊之
猗之敗死超石棄衆奔還潼關 鎮東將軍平原公
璞并州刺史尹昭以蒲坂降晉 魏太平真君十一
年宋將薛安都柳元景入盧氏進攻弘農詔洛州刺
史張提率衆度嶠蒲城鎮將何難於風陵堆濟河秦
州刺史杜道生至閿鄉元景退走 東魏天平初遷
鄴齊獻武王使汾州刺史斛律金步騎三萬鎮風陵
以備西寇軍罷還晉陽 通典通考東魏靜帝天平

四年三道伐西魏齊神武自總大衆至蒲津竇泰自
風陵濟河至潼關高敖曹入武關陷上洛以秦軍敗
沒並旋師風陵在潼關北岸相對 明崇禎十六年
冬廵撫蔡懋德以三千弱卒日往來奔走於二千五
百里之間猶敗賊大慶渡再敗之風陵渡三敗之吉
鄉渡賊屢犯屢却堅壁守者四閱月而是時闖賊已
破榆林竒嵐告急乃留千人守平陽千人守汾州自
率千人赴太原賊既偵兵離平陽布閒諜訛言賊已

渡河平陽道將以下皆棄城走

國朝順治六年姜黨虞印韓昭宣等陷蒲州八月總制
孟喬芳自潼關渡河諸將根太趙光瑞復蒲州斬首
七千級遂進兵臨晉猗氏斬賊元帥白璋擒監軍道
衛登虞印韓昭宣走據運城九月諸將狄應魁趙光
瑞沈應時根太杜米等攻拔之斬虞印韓昭宣平陽
寇悉平見王士禎孟忠毅神道碑

河曲城南六十里黃河之曲 呂相絕秦曰入我河曲

通典春秋秦晉戰於河曲即其地也

同通考

春秋文公

十有二年冬十有二月戊午晉人秦人戰於河曲杜預註河曲在河東蒲坂縣南左傳秦為令狐之役故冬秦伯伐晉取羈馬晉人禦之趙盾將中軍荀林父佐之卻缺將上軍史駢佐之欒盾將下軍胥甲佐之范無恤禦戎以從秦師於河曲魏孝武深仗周太祖乃徵二千騎鎮東雍州助為聲援仍令太祖稍引軍而東太祖乃遣大都督梁禦率步騎五千鎮河

渭合口為圖河東之計先是齊高祖使都督韓軌將兵一萬據蒲坂救侯莫陳悅而雍州刺史賈顯送船與軌請軌兵入關太祖因梁禦之東逼召顯赴軍禦遂入雍州 周建德四年七月將攻河陰大城命隋國公楊堅廣寧公薛迴率舟師三萬自渭入河

大慶關西門外黃河西岸地隸陝西路通陝西朝邑縣古名蒲津關 府志即孟明濟河焚舟地 地理通釋臨晉關即蒲津關在臨晉縣 地理志河中府河

西縣有蒲津關 金大慶關管勾河橋官兼譏察事
一員掌解繫浮橋濟渡舟楫巡視河道修完埽岸兼
率埽兵四時功役栽植榆柳預備物料譏察奸偽等
事同管勾一員 越城北門外周一百三十步西魏
大統四年造浮橋九年築城以防越渡 西關城柵
蓋城在黃河西岸以護蒲津浮梁者漢乾祐間郭威
遣白文珂克河中西關城柵於河西 竹書紀年魏
襄王七年秦王來見於蒲坂關 史記曹參以中尉

從漢王出臨晉關韓遂馬超等入關中曹操遣橫
野將軍徐晃屯汾陰以撫河東操至潼關恐不得渡
名問晃晃曰公盛兵於此而賊不復別守蒲坂知其
無謀也今假精兵渡蒲坂津為軍先置以截其裏賊
可擒也操曰善使晃以步騎四千人渡津作塹柵未
成梁興夜將五千餘人攻晃晃擊走之軍得渡遂破
超等山陽公載記初曹軍在蒲坂欲西渡馬超謂
韓遂曰宜於渭北拒之不過二十日河東穀盡必走

矣遂曰可聽令渡蹙於河中顧不快耶超計不得施
東魏天平二年八月齊神武至恒農西克潼關執
毛洪賓進軍長城龍門都督薛崇禮降神武退舍河
東命行臺尚書長史薛瑜守潼關大都督庫狄溫守
封陵於蒲津西岸築城守華州以薛紹宗為刺史齊
神武率衆十萬出壺口趨蒲坂將自后土濟還渡河
逼華州刺史王羆嚴守乃涉洛軍於許原十月癸巳
申至沙苑周太祖據東十里渭曲以待之神武兵敗

夜遁 德宗西狩朔方節度使李懷光奔命方雨淖
奮勵軍士倍道進自蒲津絕河敗朱泚軍於醴泉
元致和元年九月陝西行臺御史大夫額森特穆爾
引兵從大慶關渡河擒河中府官殺之萬戶薩哩特
哩特穆爾軍潰而遁 明洪武二年正月大將軍徐
達克河中府遂會諸將進取陝西造浮橋渡河

永樂渡東南一百二十里永樂鎮黃河北岸路通河南
閩鄉縣明洪武四年置巡檢司屬潼關衛 永樂城

東南一百二十里後周置永樂郡後省入芮城唐初

置縣屬蒲州後屬河中府宋罷縣為鎮

一云金省為鎮

通典

永樂縣武德二年分芮城縣置 金志鎮二永樂合

河 玉簪山永樂鎮純陽宮側林泉茂潔 方山純

陽宮後溪水滌洄 猫耳山純陽上宮 水經河水

又東永樂澗水注之 經濟編關中之險華山與長

河會處雖在潼關然河之南湏得河南府新安北函

谷河之北湏得山西平陽府平陽南有東塢嶺北有

冷泉關蓋河之南無新安則由沙磧可渡河至蒲州
河之北無平陽則由烏嶺冷泉入平陽至蒲州自蒲
州至龍門兩岸平廣可渡者百里故在古人秦有函
關陝西統平陽也至今陝州以西及平陽與陝西人
之語音風俗相同又曰虎牢關潼關誠為險要能以
寡遏衆然貼鄰大河若踰河避險而出則關無恃於
險矣故虎牢不守孟縣潼關不守蒲州烏乎用其險
兩谷關東南十五里中條山陰之東西麓也金將侯小

叔率昆弟兵十餘萬夜襲河中府元元帥石天應遣
偏裨吳權府事率五百兵出東門伏兩谷關諭之曰
俟其半過即翼擊之俾腹背受敵即成擒矣吳醉敵
至聲援弗繼遂陷天應死焉

獨頭坡南四十里中條山之西麓西距黃河郡走潼關
道也 雷首一丘突兀當路外臨大河內穿峻坂東
接夷齊祠南達潼關

孟盟橋東十里涑水由橋東入河 秦孟明盟師地有

堡

張村岔東六十里明洪武間置巡檢司

樂里山寨金將侯小叔駐兵於此

栲栳鎮 永豐鎮 黃龍鎮 韓陽鎮 匡河鎮 東

張鎮 永樂鎮 大陽村 焦盧村 小李村 大

澗堡 下陽堡 張華堡 趙伊堡 下莊堡 蒼

陵堡 呂芝堡 高市堡 下村堡 減莊堡 長

千堡

臨晉縣

吳王寨西三十里宋置巡檢司明設弓兵二十名今裁
相傳韓信渡河擒魏豹地 吳王渡防兵五名夾
馬渡口西三十里吳王寨南 龍門河裁廣七十步
至胡盧灘下乃廣十餘里韓信於臨晉關東陳船為
欲渡之勢而潛軍上流由夏陽急渡今禹門渡口欲
其易渡敵不及覺也臨晉縣雖非臨晉關然河面太
廣兵形易露當以水經注之說為正 昔吳王二姓

居此今為吳王渡與邵陽渡相對 魏王豹從項羽
入關羽欲有梁地乃徙豹于河東都平陽為西魏王
漢王定三秦渡臨晉豹以國屬焉漢二年敗于彭城
豹至滎陽請歸國遂絕河津畔漢漢遣韓信虜豹以
其地為河東太原上黨郡 北齊文宣時周人常懼
齊兵之西度恒以冬月中河椎冰武成即位齊人推
冰懼周兵之逼斛律光深憂之 齊王寨西北十里
齊王村東南相傳韓信屯兵於此

七及鎮西南二十五里 陶城北三十里黃河東岸唐
馬燧敗李懷光於陶斬首百餘級分會渾城逼河中
樊橋鎮東南十五里置驛相傳馬燧屯兵處

角盃村西十五里 雍正九年署刑部侍郎韓光基疏
坡西角盃村新設有把總一員吳王寨新設有巡檢
一員計二村相去僅十餘里而坡東數十里竟無一
官彈壓宜將西坡吳王寨之巡檢移駐於角盃村將
角盃村之把總移駐於坡東之耽子村互相稽察

大嶷山 小嶷山東北三十五里地形荒曠 隋志桑
泉縣有三嶷山今土人止稱大嶷小嶷

三不管處馬道王神鄰村為猗氏臨晉滎河交界

虞鄉縣

橫嶺南三十里為城界乃中條山之脊也 金貞祐二

年宣差都提控從坦言中條之南垣曲平陸為城虞
鄉河東之形勢陝洛之襟喉也可分陝州步騎萬二
千人為一提控四都統分戍四縣

王官谷東南十里 左傳文公三年秦伯伐晉取王官
及郊呂相絕秦書入我河曲俘我王官 司空圖山
居記谷之名本以王官廢壘在其側

張揚城五姓湖左 括地志張揚故城一名東張在蒲
州虞鄉縣西北四十里 東揚一名張壁漢建安中河
東太守杜畿由郎津詣邵河東人范先欲殺畿以威
衆且觀畿去就殺主簿已下三十餘人畿舉動自若
於是衛固曰制之在我遂奉之畿說固以資募兵固

以為然從之數十日乃定諸將貪多應募而少遣兵
畿又說固可分遣諸將掾吏休息緩急召之不難固
又從之於是善人在外陰為己援惡人分散各還其
家固先衆遂離會白張幹騎攻東垣高幹入潞澤上
黨諸縣殺長吏弘農執郡守固等密調兵未至畿知
諸縣附已因出單將數十騎赴張壁拒守吏民多舉
城助畿者比四十日得四千餘人固等與幹晟共攻
畿不下畧諸縣無所得會夏侯惇兵至幹晟敗固等

伏誅其餘黨與皆赦之

紅臉溝東南三十五里解州界

草坪頭西南三十五里永濟界

故市鎮 孫南鎮 鄉頭鎮 圪頭鎮

猗氏縣

令狐戍西十二里令狐村春秋晉置戍於此 原頭里

令狐村 通典有古令狐城左傳云晉文公從秦返

國濟河圍令狐即此 通考 僖公二十四年春王正月

同

秦伯納公子重耳濟河圍令狐入桑泉取臼衰二月
甲午晉師軍於廬柳秦伯使公子絳如晉師師退軍
於郇辛丑狐偃及秦晉之大夫盟於郇壬寅公子入
於晉師丙午入於曲沃丁未朝於武宮 令狐村在
嵯峨原南秦晉交爭東西經畫多在令狐瑕城之間
公子重耳濟河首圍令狐桑泉曰入臼衰曰取而令
狐獨曰圍是令狐有堅城也 春秋文公七年夏四
月戊子晉人及秦人戰於令狐 晉襄公卒使先蔑

士會如秦逆公子雍秦康公送雍於晉曰文公之入也無衛故有呂卻之難多與之徒衛趙盾與諸大夫患穆嬴且畏偁乃背先蔑而立靈公以禦秦師箕鄭居守趙盾將中軍先克佐之荀林父佐上軍先蔑將下軍先都佐之步招禦戎戎津為右及董陰趙盾曰我若受秦秦則賓也不受寇也既不受矣而復緩師秦將生心訓卒練兵秣馬蓐食潛師夜起戊子敗秦師於令狐至於劍首左傳呂相絕秦曰我是以有

令狐之役 文公十一年秦侵晉入瑕晉使詹嘉處
於瑕以守桃林之塞燭之武曰許君焦瑕朝濟而夕
設版焉晉大夫亦曰必居郇瑕氏之地闕駟曰令狐
即猗氏剗首在西三十里京相璠曰今河東解縣西
南五里有故瑕城水經注曰涑川又西南逕瑕城又
西南逕張楊城東城又東即張楊澤今臨晉五姓湖
也蓋龍門華谷以北王官谷以南地多險阨惟臨晉
猗氏由今萬泉達絳最為平坦故晉設戍於令狐瑕

城以為濟河而東之第二保障 聞人年準衛敬侯
神道銘城惟解梁地即劍首山對靈足谷當猗口
孤山南峪接萬泉界

神羌堡東北十五里嵯峨坡漢高密侯鄧禹圍安邑定

河東屯兵於此

一名鄧公堡

張岳鎮安邑縣界土堡

下任鎮臨晉縣界土堡周三百八十丈高一丈五尺
杜村鎮千佛岑南土堡周三百六十步高一丈五尺一

名油杜鎮

萬泉縣

嵯嶺東起絳州西抵黃河地勢聳翠狀如嵯嶺邑境
隸其巔 賈仁先修古城記後魏道武天賜間赫連
勃勃擾河外薛通率宗族及土人築堡自固即今古
城是也元至元十四年皇甫祐奏復萬泉縣築城隍
則為今之新城自新城築而古城漸廢城址大率南
依孤山東西二澗夾於兩旁俱稱絕險獨北面平坦

可以長驅古城據在高阜計北一面不踰百二十丈
一旦有警猶可扼其樞要而守之若新城則遙邈而
下地雖廣濶防守為難隆慶戊辰李廷棟以歲旱欲
修古城已巳二月興工春杪告成城高二丈有三尺
濶一丈有奇堞牆以甃又五尺許城不為壕 鄭章
修城記孤山層岡複坡纍纍下垂逮及山麓忽陡而
窪闊數十百武復挺豎一丘東南西崖壑峻峭惟北
稍平其旁為東西二澗壑澤阻深城之址則因其勢

剗削而為之施以版築上砌甃作睥睨三尺許如天
成萬泉四境無險峩嵎又非危巖峻坂而險在縣
據峩嵎之巔孤山麓窪而復起東西澗逼城不殊濬
濠而固

解店鎮在東北土城周二里南北二門

滎河縣

黃河縣西逼城自河津縣南流入縣境又南入永濟縣
境 辛莊防守臺廟下防守臺楊董防守臺師家防

守臺胥塌於河 汾陰渡縣北后土祠後金南陽郡

王代祀汾陰設今廢 白馬渡縣南十里元尚書范

國英擊逆黨設今廢 新渡口北十里廟前鎮西

魏秦州刺史周觀撫御失和民薛永宗聚衆於汾曲
以叛觀討永宗為流矢所中卒 蓋吳擾動關右薛

永宗屯據河側以應吳後魏世祖親討之詔汾陰薛
拔糾合宗族壁於河際以斷二寇往來之路 世祖

西巡詔司徒崔浩與尚書蘭延都督行臺中外諸軍

事世祖至東雍親臨汾曲觀永宗壘進軍圍之永宗
出兵欲戰世祖問浩曰今日可擊否浩曰永宗未知
陛下自來人心安閒北風迅疾宜急擊之須臾必碎
若待明日恐其見官軍盛大必夜遁走世祖從之永
宗潰滅

汾河縣北后土祠側西流入黃河今移河津縣葫蘆灘
南入黃河

穆陵關北十三里兩壁對立中開一線為南北孔道亦

榮河之咽喉也元韓通守此

武壁在黃河岸側凡八寨 汾陰 胡壁 趙村 薛

成 薛堡 連栢 西倉 禹門 皆元至正末築

以薛壘居中可制諸營移中軍其上更名武壁周一
千二百步面臨絕澗北開一門址存 張昌有武壁

門記

孫吉鎮東南二十里 廟前鎮北十里 薛頡鎮北四

十里 后土祠鎮 番底村縣東峩嵎原 思政村

丁家莊 楊董堡 寶鼎鄉在東南 峪口在城
東南

山西通志卷十四

欽定四庫全書

山西通志卷十五

關隘

七

遼州

黃澤關州東一百二十里十八盤山路通河南武安縣
元舊關也明洪武十一年設巡檢司今復設弁兵駐
防周三百六十步高一丈十八盤東西一徑盤旋
路有十八轉即黃澤關 摩天嶺州東九十里峯巒

峻絕勢欲摩天 轉鞍嶺州東八十里嶺勢高險崎

嶇難行 地形志遼陽有黃澤嶺 宋志遼州有黃

澤砦 宋志磁州武安有固鎮永安黃澤海回四砦

金關一黃澤 元元統二年晉寧路遼山縣十八

盤立巡檢司

國朝順治十一年撥兵駐黃澤關康熙六年撥攜室兵

永為駐防 郭緣生述征記滏口陘在磁州武安縣

當以黃澤關為正後魏永安中齊神武就食山東自

晉陽出滏口太昌中神武自鄴入滏口擊爾朱兆於
晉陽即關東西道也 隋煬帝初漢王諒將綦母良
自滏口徇黎陽塞白馬津余公理自太行下河內俱
為行軍總管史祥所敗 梁乾化三年五月賀德倫
告急於晉晉王引大軍自黃澤嶺東下與苻存審會
於臨清遂入魏博 梁貞明元年開封尹劉鄩以兵
屯於魏唐莊宗入魏鄩謂晉兵悉從莊宗赴魏而太
原可襲乃結草為人執以旗幟以驢負之往來城上

而潛軍出黃澤關襲太原晉兵望梁旗幟往來不知其去也以故不追及軍去已二日莊宗曰劉鄩長於襲人短於決戰計彼行纔及山下亟發騎兵追之會陰雨積旬黃澤道險泥深尺餘士卒援藤葛而進皆腹疾足腫或墜崖谷十二三晉將李嗣恩倍道先入鄩至樂平不克進而旋明正德六年賊楊虎等自十八盤還破武安田悅自稱魏博留後欲阻山為界曰邢磁如兩眼在吾腹中不可不取發兵圍之邢

州刺史李共臨潞州將張仵堅壁固守告急於澤潞
節度使李抱真請討之唐會昌四年詔發昭義騎
兵五百步兵千五百戍振武潞卒乘醉回旗入城閉
門大譟節度使盧鈞奔潞城以避之李德裕奏請詔
河東王宰以步騎一千守石會關三千自儀州路據
武安以斷邢洺之路又令河陽石雄引兵守澤州河
中韋恭甫發步騎千人戍晉州都將李文矩以禍福
諭之乃遣人謝盧鈞於潞城鈞還入上黨復遣之戍

振武行一驛乃潛選兵追之明日及於太平驛盡殺之

八賦嶺西一百里地隸和順壤接榆次太谷漳水在遼境者起州西八賦嶺地形志樂平有八賦嶺

摩天嶺東一百一十里武安界東六十五里至芹泉

鎮九十里至大南莊一百一十里至摩天嶺

黃澤關下云州

九十里此繇遼州言之摩天嶺下云東一百一十里者此繇武安界言之也黃澤關不叙摩天嶺形勢不全而摩天嶺又自有形勢故復見焉

莊峻嶺東北一百一十里邢臺界

土門嶺南三十里兩峯對峙如門 翻轅嶺南三十里

路最陡險 州南路村有隘隅口

上交漳 下交漳 蛤蜊灘 千畝川 狐兒巖 熟

峪村 洞子巖 十里店 東西寨村 相峪村

申家灘 雲頭底 柏兒峪 馮婆峪 七里店

石匣村 直峪溝 夫峪里 後窩峪 宋家口

突堤村 曹家寨 芍藥溝 秋林灘 故縣堡

版峪堡 東西五指 莊窠巖 隘峪里 紅巖里

長城鎮 桐峪鎮 寒桃鎮 栗城鎮 黃漳鎮

芹泉鎮 拐兒鎮 麻田鎮

和順縣

黃榆嶺口東七十里又東五里直隸邢臺縣界路通順
德府山勢崎嶇峻直上二十里南連清風嶺北接
馬嶺口為太行絕頂東疆第一險隘地明洪武三年
置巡檢司後裁今設防兵據守 黃榆嶺關清風嶺

關北三十里順德府西南一百八十里石磴盤旋形

險道衝邊牆敵樓官廨軍壘悉備

汛隸順德府

嶺有重關

巖高木密黃榆古戍即此 漢建安九年袁尚武安

長尹楷屯毛城通上黨糧道夏四月曹操留曹洪攻

鄴自將擊楷破之而還

馬嶺關黃榆嶺關北三十里順德府西北一百六十里

居民千家山勢殊險邊牆敵樓官廨軍壘悉備下有

澗溝二十餘丈名鬼谷相傳王詡藏修於此又即龐

涓夜度處

汎隸順德府

清風嶺關黃榆嶺關南三十里順德府西南一百八十

里山勢高聳盛夏不知暑邊牆敵樓水門各一澗水

通流其下

汎隸順德府

露蘿嶺關順德府西一百八十里兵禦悉備

汎隸順德府

黃背巖關在沙河縣西南一百九十里山勢崇高兵防

悉備北至數道巖關三十五里

數道巖關在沙河縣西一百五十里澗溝之路旋繞數

層

八賦嶺口西一百二十里儀城鎮嶺有二懸崖曲磴西北曰黑虎關赴太原要道西南曰青龍關赴平汾要

道設巡檢司

古儀州城址尚存

松子嶺口北四十五里和順樂平二縣界山勢最高四季風鳴蜿蜒輿曲袤亘二十餘里嶺有關路通正定五代河東守險之地今潞澤遼入直隸孔道也明正統八年置巡檢司後裁今設防兵汛守

石鼓嶺南四十五里上有石鼓 王思誠詩南嶺風吹

石鼓鳴

風門嶺又東五里邢臺縣界

桃樹平嶺又東五里邢臺縣界

黨城口東四十五里又東二十里至風門嶺東北二十

五里至黃榆嶺口

和順古城在縣城西北與縣城相倚垣蹟微存周圍四

百六十步古闕與聚也 周赧王四十六年秦攻趙

闕與不拔 秦伐韓軍於闕與廉頗樂乘曰道遠險
狹難救趙奢曰道遠險狹譬之猶兩鼠鬪於穴中將
勇者勝趙惠文王令趙奢將救之兵去邯鄲三十里
而令軍中曰有以軍事諫者死秦軍軍武安西鼓譟
勒兵武安屋瓦盡振軍中候有一人言急救武安奢
立斬之堅壁留二十八日不行復益增壘秦間來入
奢善食而遣之間以報秦將秦將大喜趙奢已遣秦
間乃卷甲而趨之二日一夜至令善射者去闕與五

十里而軍軍壘成秦人聞之悉軍而至軍士許歷請以軍事諫奢曰內之歷曰秦人不意趙師至此其來氣盛將軍必厚集其陣以待之不然必敗奢曰請受令歷曰請就鈇鑕之誅奢曰胥後令欲戰許歷復請諫曰先據北山上者勝後至者敗趙奢許諾即發萬人趨之秦兵後至爭山不得上趙奢縱兵擊之大破秦軍秦軍解而走遂解閼與之圍而歸王賜奢號為馬服君以許歷為國尉如耳見成陵君曰昔魏伐

趙斷羊腸拔關與括地志關與聚落今名烏蘓城
在潞州銅鞮縣西北二十里又儀州和順縣城亦云
韓關與邑二所未詳又有關與山在潞州武安縣西
五十里正義關與山在潞州武安縣西南五十里
趙奢距秦軍於關與即此山也按括地志云言距秦
軍在此山疑其太近潞州既去邯鄲三十里而軍又
云趨之二日一夜至關與五十里而軍壘成據今潞
州去潞州三百里間而隔相州恐潞州關與聚城是

所距據處 正義闕與故城在潞州及儀州 索隱

在上黨沾縣西 通典漢沾縣地即韓之闕與邑

通典儀之和順韓之闕與 寰宇記今名曷蘓城銅

鞮西北二十里今潞之銅鞮故闕與城漢梁榆也九

域志一曰榆城盧川征艱賦訪梁榆之虛郭乃闕與

之舊都即此 明一統志闕與城名在沁州城西北

二十里史記趙奢大破秦軍解闕與之圍即此地漢

曰闕與聚俗呼烏蘓村 按諸說惟水經注索隱及

括地志和順縣城得之正義未有計過險狹及既去
邯鄲三語亦善畫道里形勢蓋二日一夜至關與五
十里是趙兵業過黃榆嶺口不懼其險狹難救也先
據北山是先據松子嶺松子嶺在縣北三十里不類
八賦石鼓之遠而山又最高險得以高臨下之勢也
沁州西北二十里烏蘓村距吾兒峪太遠非邯鄲進
兵便地武安縣西南五十里正義辨已哲 韓信擒
夏說於關與亦當屬和順蓋和順北百六十里而至

柏井驛為信駐兵地又三十里而至井陘口道里殊不遠也今縣有韓信舊寨古壘尚存

馬嶺曲鎮東五十里 虎峪鎮東六十里 傾城村東

八十里 青家寨東六十里 寒湖鎮西四十五里

橫嶺鎮西八十里 儀城鎮西一百二十里 馬

陵村西一百三十里 北安驛村南二十五里 南

安驛村南三十里 石勒村北三十里 西石勒村

北九十里 馬防鎮北九十里 松烟鎮

榆社縣

馬陵關西北八十里太谷縣界舊設巡檢司今廢 梁
惠王三十年太子申與齊戰敗於馬陵徐廣曰在元
城索隱按紀年云二十八年與齊田盼戰於馬陵又
上二年魏敗韓馬陵十八年趙又敗魏桂陵桂陵與
馬陵異處正義虞喜志林云馬陵在濮州鄆城縣東
北六十里有陵澗谷深峻可以置伏按龐涓即敗此
也徐說馬陵在魏州元城縣東南一里龐涓敗非此

地也按馬陵之役太子申過外黃見外黃徐子不聽其言而敗括地志外黃有南北二城在汴州雍邱縣界雍邱今開封府杞縣與濮州差近次則元城而與今太谷榆社絕遠已於太谷志中辨之要之馬陵關自是太原遼州要疆殊不繫龐涓墓孫臏坡也北有孫臏坡相傳孫臏伏萬弩處

黃花嶺西五十里舊設巡檢司今廢 漳河源出縣西北六十里黃花嶺

武鄉嶺東四十里接遼州界嶺下即儀川河源

狗腰關南五十里接武鄉界

雲簇鎮西三十里步兵防守市集勝邑城

社城鎮西北三十里後漢涅縣晉改武鄉縣墉堞盡廢

今為市鎮其途北通太原府西通太谷

魏城鎮南三十里偃武廢縣有遺址南通武鄉上黨通

衢

箕城鎮東三十里唐箕州治此廢

沁州

交口堡北三十五里韓侍里 漳源鎮 交口鎮西北
渡漳源經走馬嶺乃武鄉界也繇此而權店龍舟峪
麓臺團柏谷險道二百里有奇鎮寔為綰轂口

段柳村南五十里陳柳里 段柳舖南十里 宋太平
興國二年於銅鞮縣界亂柳石圍中建威勝軍以銅
鞮武鄉二縣屬之 唐天祐四年晉王李克用以蕃
漢都指揮使周德威為行營都指揮使壁於高河與

梁拒戰及晉王病篤乃退營亂柳即今段柳村也

周世宗時建雄軍節度使楊廷璋前後率兵入太原境拔仁義高壁等砦獲刺史軍校數十人俘其民數千戶獲兵器羊馬數萬計并人棄沁州二百里退保新城廷璋遂置保安興同白壁等十餘砦是時沁州僑治沁源綿上間新城乃亂柳北城也顯德六年夏楊廷璋率所部入河東界下堡砦十三降巡檢使靳漢晁等三人

常脚嶺東二十里武鄉道

聖佛嶺西五十里沁源道祝志南六十里沁源縣西北
七十里

鳴蘓村西北二十里 漢地理志關與聚土人訛為鳴
蘓 通典有闕與故城漢韓信擒代相夏說於此關
與當以水經注索隱括地志為正說詳和順

故縣鎮西南四十里 郭莊鎮在州北 牛侍鎮西湯
鎮胥在州東北 倪村在州東 荆村在州東南

花山寨東北三十里 西峪寨西北六十里 喬村

寨西北二十五里 段村寨西二十五里 堯神寨

西南三十里 寺莊寨西南四十里 上執寨西南

四十里 南仁寨西南四十五里 新店寨西南三

十五里 黃后寨西五十里 道興寨西南二十里

開村寨西二十里 南泉寨西南六十里 郭村

寨西南二十五里 王可寨西北四十里 松交鎮

孫村在州西

沁源縣

綿上關北八十里綿上都 綿山北一百二十里盤踞
百里連介休介山抱腹巖萬峯層踞澗壑杳邃冬雪
入夏不消樵人嘗得冰蛆 綿上縣故城在北八十
里綿山下即今綿上鎮也 明洪武二年置巡檢司
後裁 水峪河在北七十五里源出水峪村至綿上
鎮東入沁河 宋志綿上縣寶元二年自大通監來
隸威勝軍慶歷六年徙砦軍西北大覺寺地 金志

綿上有羊頭山沁水

郭道鎮北少西六十里 仁霧山北五十里郭道鎮之
東自綿山分脉而來綿亘六七十里突起高峯旁分
兩臂彎環迴抱前脊起銳峯如雙闕中通一道沁河
縈繞於外 澧河西北八十里源出靈石縣界太平
頭石巖下三穴出水甚急至郭道鎮入沁河 隆慶
元年九月俺答兵至郭道鎮而返

鵬巢嶺東南五十里接屯留縣境 縣志綿山鎮其北

沁河繞其南鵬巢嶺踞其東霍太山峙其西

柴店關唐置今廢 唐志有柴店關今南路有柴則坪

鐵冶柴則坪寨

保安寨城西紫金山明崇禎五年知縣范廷輔建以衛

城

柏子鎮在西南叢山中近岳陽界

韓洪鎮在西少北

綿上堡 官軍鎮堡 霍登堡 興居堡 王莊堡

王和堡 大色堡 王段堡 任家莊堡 石渠寨

下留寨 安樂館寨 侯壁寨 陽城寨 師莊

寨 郭道寨 王鳳寨 定陽寨 蠡則峪寨

武鄉縣

南關西一百二十里 南關驛 涅源都南關里領村

二十有六中有南關三晉咽喉地石板溝權店置驛勲歡護

甲即古分水嶺合渠南北二水至此合為一渠渠溝諸村 分水嶺在

龍舟洞西一百里護甲鎮洞水一源分為二派其一

北流龍舟峪其一南流繇權店驛至縣合漳水即涅水也 護甲山在西北一百里

一名侯甲

其山有口即分

水嶺涅水出焉

麓臺山在西北一百二十里接沁

源靈石祁平遙四縣境

陰廵在西一百三十里南

關鎮北兩峯對峙高出雲表山半一道裁通往來護

甲水繞其下昔人建立南關壘尚存

金武鄉鎮一

南關

王世貞適晉紀行午飯沁州又數十里小憩

鋪舍大雨忽作轉入深谷中兩傍皆峭壁中通間道

飛瀑懸崖而下聲如轟雷計別取高嶺箭括一門十步九退時時行絕磴間陽壁直上不可捫陰壑數十百丈大約如蜀中左擔山之險抵一鋪束燎而前凡數渡水河流砰湃噌吰若擊數千鈺行里許復逶迤攀高嶺其峻陜視前更倍勉上輒前踣下輒後踣又里許道差寬而權店驛候火亦至抵驛將二鼓矣明日已稍晴乃發兩岸皆高山絕雲中為巨澗沿澗水而北崩峽東流峽皆石骨左道盡則渡而右右道盡

復渡而左凡數十渡氣竭興亦盡未至南關驛大抵
無非山者其中罅為澗澗傍稍高為道道稍有羨地
則為市舍羨地稍寬而稍阜險則為城邑城邑之所
不盡坡陀上下則為田 明隆慶元年俺答大入至
南關而返

合祁縣龍舟峪觀之
乃得其形勢之全

昂車關西北三里唐置今廢 漳川鄉下關村昂車關

故址漳水經此

漳川鄉又
有上關村

唐志北有昂車關 唐

討劉稹河東節度使劉沔將步騎二千守昂車關壁

榆社又取石會關

土河寨東七十里西南北三面阻絕深澗東面有牆今

名土河村

洪水鎮東七十里

舊名橫水土音訛為洪水

唐討劉稹於昭義軍會

橫水戍兵叛入太原逐其帥李石奉裨將楊弁主留

後事即此地也 橫水戍莫詳處所鳳翔東十里夜

叉河之說甚為迂遠李德裕曰李相正以河東無兵
故發橫水兵赴榆社則縣志洪水鎮之說亦未慙核

但洪水東北距墨鐙峯三十里黃水自榆社北來鎮
適據其衝而武鄉東境最延袤自繫控制勝地

大界峽東八十里黎城界

故城鎮西北五十里古蔡臯狼地 涅城西五十里漢

上黨郡涅縣地後趙郡治今名故城城堞尚存 臯

狼城西五十里 自交口北至團柏谷子洪鎮大約

皆古蔡臯狼地智伯瑤求之將以制晉陽也故趙襄

子不許鎮城特其南原爾 故城鎮西十二里至權

店驛

開壑口北十里榆社界

高嶺南二十里襄垣界

重城寨在墨鎧鎮石壁萬仞半崖一徑差可陟寨巔而
草木翳之不知其有寨也石竇清泉可以撒橋宴坐

墨鎧至鍋窰嶺十二里遼州界

攀龍鎮東四十里東至大界峽四十里東北至鍋窰嶺
六十五里

重柵寨

一名岑彭寨

在縣東

墨鎗村

驢腦寨

一名馬武寨

監張東二十里

韓壁寨東五十里

中多古寨

北馬樂

村東五十里

大曲鎮東七十里

段村西十里

南亭西十里

陽城地勢臨高面俯漳川古陽城縣

地

石盤西九十里

信義西七十里

平定州

井陘關舊名井陘故關路通井陘縣即漢韓信擊趙下

井陘口也明正統二年置故關巡檢司後裁故關

山州東九十里兩山險隘關踞其中即古井陘口北
十里為娘子關 甘桃口在井陘關南三里明築城
建新固關設守禦千戶所一員隘口有巡檢司地隸
平定汎隸正定府 惡石口在正定府城西自是西
南一十五關口至故關 故關在井陘縣西四十里
共轄隘口三十六處 通典石艾東有故關甚險固
正義井陘故關在并州石艾縣陘東十八里即井
陘口 宋志平定軍有故井陘關柏井砦太平興國

二年以鎮州廣陽砦建為軍 柏井城在州東五十里漢韓信所築史稱未至井陘口三十里而舍即其地也 唐長慶初裴晉公駐兵承天軍分兵置守

宋太祖開寶中改置柏井寨命太子賓客殿中侍御史雲騎尉李溫守禦 明嘉靖二十一年重修號柏井堡四面據河地勢高二十丈方二里許東北隅樂平縣建倉糧草場以備客兵芻餉 韓信擊趙駐兵於今平定州築城為塞以榆塞門遂名榆關即州城

上城也 試劍峯在州東二十里分裂類劍劈傳為

韓信駐兵試劍地 漢高帝三年十月韓信張耳欲

東下井陘擊趙趙王歇成安君陳餘聚兵井陘口號

稱二十萬廣武君李左車曰信耳乘勝遠鬪其鋒不

可當今井陘之道車不得方軌騎不得成列其勢糧

食必在後願假臣奇兵三萬從間道絕其輜重足下

深溝高壘勿與戰彼前不得鬪退後不得還野無所

掠不至十日而兩將之頭可致於戲下否則必為所

擒矣成安君不聽韓信使人間視知其不用還報大喜乃敢引兵遂下未至井陘口三十里止舍夜半傳發選輕騎二十人人持一赤幟從間道躡山而望趙軍誠曰趙見我走必空壁逐我若疾入趙壁拔趙幟立漢赤幟令其裨將傳餐曰今日破趙會食諸將皆莫信佯應曰諾信謂軍吏曰趙已先據便地為壁且彼未見吾大將旗鼓未肯擊前行恐吾至阻險而還乃使萬人先行出背水陣趙軍望見大笑平旦信建

大將旗鼓鼓行出井陘口趙開壁擊之大戰良久於是信張耳佯棄鼓旗走水上軍水上軍開入之復疾戰趙果空壁爭漢鼓旗逐韓信張耳信耳已入水上軍軍皆殊死戰不可敗信所出奇兵二千騎共候趙空壁逐利馳入趙壁皆拔趙幟立漢赤幟二千趙軍已不勝不能得信等欲還歸壁壁皆漢赤幟大驚以為漢皆已得趙王將矣遂亂遁走趙將雖斬之不能禁也於是漢兵夾擊大破虜趙軍斬成安君泚水上

擒趙王歇諸將賀問曰兵法右背山陵前左水澤今將軍反背水陣曰破趙會食臣等不信然竟以勝此何術也信曰此在兵法顧諸君不察耳兵法不曰陷之死地而後生置之亡地而後存乎且信非得素拊循士大夫也此所謂驅市人而戰之其勢非置之死地使人人自為戰令予之生地皆走尚可得而用乎諸將皆服曰善非臣所及也 水經注綿蔓水又東流逕樂陽縣故城西右合井陘山水水出井陘山世謂

之鹿泉水也東北流屈逕陳餘壘而俗謂之故壁城
昔在楚漢韓信東入餘拒之於此不納左車之計悉
衆西戰信遣奇兵自間道出立幟於其壘師奔失據
遂死泝上其水又屈逕其壘南又東逕城西東注綿
蔓正義綿蔓水一名阜將一名回星自并州流入
井陘界即信背水陣陷之死地即此水也綿蔓水
一名畢發在州東九十里娘子關平地突起下赴絕
澗懸流千尺號水簾洞即井陘治河之源也東至蒲

吾入潯沱水即澤發水 元楊先韓淮陰侯廟記獲

鹿舊有淮陰廟在土門西道北岸上即井陘口古戰

處也 晉太元十三年慕容垂遣鎮西將軍丹陽王

續龍驤將軍張崇出井陘攻慕容永弟武鄉公友於

晉陽九年五月克晉陽 後魏冠軍將軍于栗磾潛

至晉陽開韓信故道自井陘攻常山拔之 晉泰元

年八月爾朱兆率步騎二萬出井陘趨殷州李元忠

時鎮廣阿棄城還信都 隋末石艾人王君廓掠邯

鄆邯鄆人王君愕說曰井陘之險可先取君廓從之
遂屯井陘山 唐天復元年四月梁將葛從周入土
門抵晉陽 後周顯德四年四月周李重進將兵入
土門已已敗北漢兵於百井斬首二千餘級 宋開
寶二年閏五月駕自太原還戊辰駐蹕於鎮州 太
平興國四年四月壬戌帝發鎮州庚午次太原 明
平定州志序平定太原支郡地稱巖險四方有事塞
井陘之口足以自固國家錯置州將直隸後軍都督

府有深意焉 嘉靖辛丑俺答入太原候騎薄其城
下畿輔震驚守臣奏立新固關為外拒於黃榆馬陵
諸關築長城數百里刁斗之聲相聞 故關教場在
故關內西山下 後唐同平章事馮道嘗戒明宗曰
臣為河東掌書記時奉使中山過井陘之險懼馬蹏
失不敢怠於銜轡及至平地謂無足慮遽跌而傷凡
蹈危者慮深而獲全居安者患生於所忽此人情之
常也 日知錄建武十五年徙雁門代郡上谷三郡

民置常山關居庸關以東

娘子關州東北九十里井陘關北十里即古葦澤城相
傳唐平陽公主駐兵於此一說以妬女祠名大厯元
年河東節度使張開府築有胡伯成記今廢裴晉公
征河朔駐兵於此明嘉靖二十一年建城設百戶一
員地隸平定州承天都汎隸正定府 隋開皇十六
年置葦澤縣屬并州唐貞觀元年省入井陘 承天
山東八十五里山形峭拔上有老君洞 承天軍城

東北八十五里承天山上唐建承天軍為太原恒山之界 葦澤城在井陘縣東北二十五里 金鎮二

承天東百井 唐光化二年氏叔琮破承天軍遂破

遼州至榆次四月取澤潞 天復元年四月汴別將

白奉國破承天軍 五代趙王王鎔會晉王李存勗

於承天軍奉觴為壽存勗以鎔父友尊禮之酒酣為

鎔歌拔佩刀斷衣而盟許以女妻鎔子昭誨 明洪

武二十四年廢承天軍為砦 嘉靖二十二年復修

為承天寨 桃水西九十里出壽陽縣太平谷經州
境至亂柳受南川嘉水會石門河青玉峽至承天都
合澤發水繇石峽東流入冶河色如桃花一名桃江
或曰即洮水 綿山東九十里娘子關一名紫金山
澤發水出焉 裴度老君洞題名鎮州四面行營都
招討節度觀察處置使為北都留守司空兼門下侍
郎平章事晉國公駐兵承天軍 曹命修守禦千戶
所記秦王翦漢韓信唐裴度五代漢祖劉暉皆統大

軍駐於平定

盤石關東北七十里一名石門口路通平山縣界 唐

志廣陽東有井陘故關東北有盤石故關葦澤故關

白城口東一百四十里路通贊皇縣界

厭谷口東一百四十里路通元氏縣界

西交口山武鄉縣界

黃土寨州西義井都 托天寨州西測魚都 北峯寨

州西新興都 禹家寨州南郭村都 廣陽寨州南

廣陽都 東昌寨州南尚義都 梨園寨州南寧艾

都 東峪寨州南東郊都西郊舖 淮陰寨州東東

會都柏井鎮 羅鍋寨州東營莊都 晉盤寨州東

測魚都 青龍寨州北盤石都 移穰寨州北移穰

都 卧虎寨州北白羊都 聖僧寨州北白羊都

秋村寨州北拒城都

壽陽縣

饑虎寨北三十里西張村四面壁立高十餘丈廣十四

五畝井深十三丈北峙青龍寨相距裁十數武亦險絕

西張寨金興定四年從遼州刺史從宜行元帥府事郭文振請升壽陽縣西張寨為晉州

黃嶺西北五十里 黃嶺墩 嶺皆黃沙 明嘉靖九

年十月俺答南下蹂盂之方山等村至黃嶺界而還

宗禎十六年十二月叛將白光木率衆繇黃嶺抵

宗艾鎮次日官兵追之未及鎮二里許至婁家坪為

賊伏兵所敗次日復追至縣南賈卜坪大戰官兵復
敗

東王坡西四十里上下崎嶇

捨身崖西六十里陡險

遂成鎮西七十里要羅山中明嘉靖十三年分巡僉事

方日乾檄主簿牟嘉績建鎮今廢

渦山南八十里南接和順界

太安鎮西五十里為太安驛太安寨 張淨鎮東三十

里 宗艾鎮北二十里 宗艾寨在北定二都廢

解愁鎮北三十里 解愁寨在北定三都廢 雷公

寨在雷公村 山南寨在東寧四都 景上寨在東

寧五都 白馬寨在南康一都 孤嘴寨在南康三

都 燕竹寨在西安一都 清平寨在西安二都

狄那寨在西安三都 西塢寨在西安四都 孫家

寨在西安八都 溫家寨在北定一都 獨北寨在

北定三都 寨底寨在北定三都 長榆寨在北定

三都 羊頭寨在北定四都 保安寨在北定七都

上峪寨在北定七都

孟縣

榆棗關東北一百一十里伏馬關東北四十里潯沱河
所經路通平山縣古設關今廢土人名榆棗口繇縣

北至五臺路

省志縣東北四十里誤

伏馬關東北七十里舊名白馬關路通平山縣古設關
今廢 白馬山東北七十里東有白馬關 圖經白

馬之山牧馬之水出焉 唐志孟縣東北有白馬故
關 金志有白馬山泉仇山滹沱水 元癸未河北
西路都元帥史天倪徇山遂克三關不浹旬定四十
餘砦

六嶺關東北六十里路通平山縣 唐博野樂壽二縣
介范陽成德間每交兵先薄二城故常為劇屯德宗
以李寰守博野王廷湊叛二縣堅壁固守寰所領士
隸右神策號忻州營牛元翼出深州寰亦引兵三千

趨忻州廷湊邀之震斬三百級追者不敢前後授橫

海節度使討李同捷按軍不進乃罷忻州營

博野趨忻州當

縣孟

兩嶺山西一百二十里陽曲界山勢如畫當二邑東西之交二十里無聚落

十八盤關東北八十里平山縣界

中社北六十里

牽牛堡在牽牛山 牛村堡 杜村堡 洪塘堡 小

坪堡 小湖堡 新莊堡 梁村堡 蔣村堡 郭

秋堡 漢戶堡 凌井村堡 蘭村堡 樓里堡

待賢堡 石假堡 西烟鎮 西烟堡 城武村堡

樂平縣

黃沙嶺東一百二十里接贊皇縣界嶺東為九龍關

老人峯東六十里踞黃沙嶺隘口 爾朱兆至廣阿

齊獻武王令遙授并州刺史李密募殷定二州兵五

千鎮黃沙井陘二道 竇建德援王世充命檢校并

州總管劉世讓率萬騎出黃沙嶺襲洺州 唐李誼

承天寨記開府張公奉璋於黃沙嶺築德化城 十

八盤嶺贊皇縣西六十里山勢嵯峨林木叢茂中有
小徑縈紆上下有十八盤

鶴度嶺東九十里五代時北漢守險之地隘口有石城
今隸直隸臨城縣嶺東下高卑迴殊號為天險 一

名仙臺又名錦繡臺 元好問詩仙人臺高鶴飛度
錦繡堂空去無路人言馬嶺差可行若比黃榆猶坦

步 喬宇詩更指西南佳勝處太行青翠接中條

鶴度嶺在內邱縣西一百七十里 漫天嶺在鶴度

嶺北 麥穗嶺在漫天嶺東 鶴度嶺關在內邱縣

西一百七十里山高惟鶴可度最為險要仰面攻者

弗克 錦繡堂關與鶴度嶺關相聯

馬嶺關東南一百里接邢臺縣界直隸設兵戍守 白

巖山麓踞馬嶺隘口乃北漢守險地也遺址尚存東

接邢臺縣境 王雲鳳詩厚坤忽擁太行脊上倚青

天纔一尺瀑布直下三千丈六月時有冰花積鳴泉
汨汨山翠微一泓不動玻璃碧 馬嶺石橋

松子嶺南四十里接和順縣界嶺北有小松水又有松

溪水 蘇祐詩高穿虎豹羣太行應絕頂 孫繼魯

詩太行松子嶺天作出羣山

靜陽村縣東北漢劉崇置砦以扼周師北控井陘漫天

南控黃沙黃榆 宋志樂平有靜陽砦 金鎮一淨

陽

石人寨在臯村周二百步高七十餘丈山狹而盤旋下有石窰可容數百人繇窰門鳥道而上即寨也金元時閻甫閻顯率鄉人避兵於此巖間一石若兩人相負因以名寨

安陽寨在北界都村 青花寨在野頭村 黑石寨在孔子村 石龕寨在白陽峪口 寨裡鎮 店上鎮 忻州

忻口北五十五里兩山中夾潯沱水寔晉陽門戶萬厯

二十九年巡撫魏允貞用石甃堡險固可守 忻口

諸山北五十五里山甚多踞潯沱曲鎮堡在焉 王

箭崖忻口北東岸俗名將軍背 忻口故城北五十

里在忻口堡西半址存相傳漢高祖自平城還師駐

此築城水東有猶寨 宋志秀容有石嶺關忻口雲

內徒合四砦 通典忻州因忻口為名 後周圍太

原契丹救漢出忻代世宗遣符彥卿拒之以史彥超

為先鋒戰忻口彥超左右馳擊解而復合者數四遂

歿於陣世宗遽班師遼應歷時周人侵漢以南院
大王塔喇都統西南道軍援之周已下太原數城漢
人不敢戰及聞特烈兵至周主遣郭從義尚鈞等率
精騎拒於忻口特烈擊敗之獲其將史彥超周軍遁
歸復所陷城邑

雲內口西七十里龍門山北雲中水所經也宋孟良常
守此明初巡檢朱德亮守之亦名寨西隘口西至蒲
閣寨通靜嵐石隰等路北至沙溝寨通寧化寧武等

邊嘉靖三十四年吉囊自寧化等處寇太原由此北
出即雲內鎮一名雲內堡 省志寨西隘口乃雲內
鎮也一名雲內堡忻州西北明洪武間置巡司後裁
孟良城西北七十里蒲閣寨東又雲內口東有教場址
存

石嶺關南四十里界陽曲縣設巡檢司 通考秀容有
石嶺關 定襄石嶺關甚險固 六郎城南四十里
石嶺關北宋楊延昭駐兵於此

赤塘關西南五十里路村一都東南入省城 唐赤塘
關屬陽曲 金石嶺關專屬忻州 雲內赤塘一帶
西南直通晉陽 東高西高二堡州治西北六十里
地皆平行唐宋戍石嶺赤塘二關郡置防禦團練使
明不設兵嘉靖庚申諳達由寧武諸口入犯忻口迤
西東高西高等都一帶平行騎渡沙河直抵郡城入
雲內口過赤塘直抵省會 赤塘谷西五十里白馬
山谷即五代時劉赤塘所隱也

白馬山西南六十里北連大嶺山西南界靜樂遼保

寧初宋圍太原以北院大王耶律烏哲率兵往援至
白馬嶺遣勁卒夜出間道疾馳駐太原西鳴鼓舉火
宋兵以為大軍至懼而宵遁北漢廣運六年三月
遼乾亨元年也南府宰相耶律沙援北漢與宋將郭
進遇於白馬嶺時遼兵阻大澗沙與諸將欲待後軍
至而戰冀王迪里監軍穆濟等以為急擊之便沙不
能奪敵烈等以先鋒渡澗未半為宋人所擊兵潰敵

烈及其子蛙哥沙之子德里突呂不部節度使圖敏黃皮室詳袞唐古等五將俱沒士卒死傷甚衆會南院大王色珍兵至萬矢俱發敵軍始退

牛尾莊巡檢司西南百里 牛尾莊寨在忻州西南九十里白馬山西南路通靜樂縣界明洪武七年置巡檢司

沙溝寨西北七十里洪武間置巡檢司

貓寨北五十里白村里忻口東極險元設戍兵明正統

末也先入石巨射退四十七騎寨獲全

雲中山西北八十里與雙尖山連北界崞縣

大嶺山雲中山西二十里北連崞縣黃嵬山西界靜樂

虎頭山寨遊邀堡胥東南二十里代郡堡東北三十

五里三交堡西六十里魏家溝寨王家寨胥西

七十里蔡尖寨西七十五里高崖寨西南七十

里麻會鎮堡南二十里關城堡南四十里上

下閘峪二堡西四十里米家寨西北六十里南

高寨西北五十里 部落堡北五十五里 吳家堡

北四十里 高村屯堡東北四十里

定襄縣

蔣村東北二十里滹沱河北有蕎麥寨勢極峻聳隔河

南對神山寨與玉池灣胥要地 明嘉靖末俺答破

蕎麥寨

神山寨東北十五里滹沱河南壘石山嶺北對蕎麥寨

虎頭山西南三十五里西接石嶺關以形似名

段木山東北四十里接大關 明嘉靖四十年土賊夜
藏段木山晝出擄掠兵巡道王喬年及常參將設計
誘之夜發兵擒獲四十餘人餘黨解散

開門峪東南十五里一山中分相對如門 今孟縣故
城名自開城相傳趙盾射龍於此

龍頭山西北三十五里潯沱河水經其旁對水西忻口鎮
玉池凹南三十里孟縣宋莊界

叢蒙山南二十五羣峯聯絡山尤聳峙

上湯頭村山寨西北三十里嶧縣板市界

卧虎山北三十里

青石村土寨東北三十五里五臺東冶村界

五石峪山東二十里

十八盤山東三十里盤旋而上一十八轉接五臺大關

窩頭山東南二十五里上有羊腸產石炭

東廊村堡東十里 劉暉村山寨東南十里 南王村

山寨東南十五里 張村堡南十里 蟬村堡南十

里 智村堡西南十五里 長安村堡西十里 藍

臺村堡西十五里 向陽村堡西北三十里 橫山

村甄堡北三十里 鎮安村堡東北二十五里 砂

村山寨東北二十五里 芳蘭村堡東北三十里

牛臺村堡東北三十里 芳蘭鎮 中霍村 橫山

村 南受羅村

靜樂縣

兩嶺關東六十五里土城周三百五十步高一丈一尺

兩嶺山高五里盤踞四十里兩山相對面北北嶺面
東南東至石莊北至忻州界西至固鎮乃管涔山東
北枝轉南折北之兩脊也西北諸鎮並榆林寧夏取
道焉 明初調太原左衛官軍又置巡檢司守之洪
武八年移巡檢司於順水村今在故鎮 兩嶺隘在
縣東南六十里南通陽曲縣

鹿徑嶺關西六十里嵐縣界路通岢嵐舊置巡檢司後

裁 鹿徑嶺山

一名鹿
縱嶺

西六十里蘆茅西出枝南度者在

嵐縣界 趙吉士議據管涔鹿徑則宣大河保隔而
為二而偏頭寧武直拊其背而扼其吭 洪谷岢嵐
洪谷即今鹿徑嶺道也詳岢嵐

娑婆嶺隘東八十里土城如兩嶺明初調太原左衛兵
守之洪武七年置巡檢司後司移天門關 娑婆隘
西五十里有馬家會隘口 東北十里有石神嶺隘口
通忻州界 西北三里有橋門嶺隘口 東南十餘
里有楊寨溝隘口 南十里有懸鐘嶺隘口通忻州

牛尾寨

樓煩鎮南七十里東臨汾水西抵周洪山通交城縣本
宋金縣也元改置巡檢司明因之洪武二年建樓煩
巡檢司舊稱副巡檢以土人為之 樓煩城南七十

里址存 通考憲州本樓煩監牧嵐州刺史領之唐

貞元十五年別置監牧使 隋煬帝十一年秋九月

自雁門郡入樓煩關以還 唐樓煩郡東南去理所

二百五十里兵三千人 唐北有樓煩關 宋白續

通典憲州故樓煩監牧 唐昭宗龍紀元年李克用

表置憲州北漢因之領縣三

樓煩
天池

元池 宋咸平五

年以州地卑隘多水潦移治靜樂軍之靜樂縣遂廢
軍又廢天池元池二縣入靜樂非今樓煩鎮也

故鎮巡檢司洪武八年置

風溝堡 武家莊瓢堡 下馬城堡 高家堡 桑園

堡 巾字山堡 磨管峪堡 鳳凰山寨 北馬房

屯寨 西馬房屯寨 龍和寨 任家村寨 南樓

煩鎮 閭市崖 天城店 西馬房鎮 北永安鎮

代州

雁門關古勾注東西陁之地雙關斗絕雁度其間故名
古有雁門關明洪武七年置代州振武衛轄六千
戶所即代北四十里置關仍置守禦所景泰元年以
都御史提督關務後用山西巡撫兼之關外大石牆
三道小石橋二十五道北為廣武站轄隘口十八東
為水峪為胡峪為馬蘭為茹越為小石為大石為北

樓為太安為團城為平刑西為太和一名白草溝為
水芹為吊橋為廟嶺一名夾柳樹為石匣一名鵬窩
梁為陽武峪為元岡為蘆板口胥有堡 正德十一
年都御史李鉞於雁門東築七堡石牆吳城六即以
遏山陰之衝東梁坡亂石灘駱駝石以遏應州之衝
天井梁以遏渾源州之衝雁門西築四堡八岔石匣
小蓮花以遏馬邑之衝夾柳樹鵬梁以遏朔州之
衝 嘉靖十九年都御史劉臬請城雁門隘塞三百

里高濶以一丈五尺為式掣回大同協守班軍分戍
十八隘雁門平刑盤道梁為阨塞繇雁門東顧則平
刑西顧則盤道梁介乎東者則水峪胡峪馬蘭茹越
小石大石太安團城凌雲葫蘆焉介乎西者則太和
白草八岔小蓮夾柳燕水鵬窩元岡焉是所名十八
隘也自宋有之而州西二十二里陽明堡正走晉陽
道都御史許守謙兵備張惟誠砌築甃石為內助之
險野史代城之北層巒疊嶂四十里至雁門節節

高上直在雲端關外即古沙漠地二十里至廣武站
視關又在十里之上即宋楊六郎屯兵故址烽墩鱗
鱗俱在嘉靖時吉囊從寇家梁入犯忻州崞縣一帶
蓋寇之行必於山巔高阜處故名山脊曰梁萬厯三
十三年巡撫李景元為築牆之議綿亘十五里堅固
精好外護雁門內鞏省會寇不敢窺焉 楊六郎寨
雁門關北口東山上隸馬邑縣在縣南五十里其西
五里有佳吉寨 傅家坪土橋石橋皆在雁門關

三關志雁門封山表郡舊矣十八隘自宋有之宋失
山後以此為防 山西之關四十有餘皆踞隘保固
而聳拔雄壯則雁門為最 喬宇雁門山記午上關
折西躡高嶺絕頂四望則繁峙五臺聳其東寧武諸
山帶其西正陽石鼓挺其南朔州馬邑臨邊之地在
其北 鄧亨疏代州雁門關西抵寧武偏頭東連紫
荊倒馬逼近朔州威遠為京畿之藩籬作山西之屏
垣自正統景泰年間以來也先俺答節從雁門關東

茹越等口入寇直至忻州繁峙五臺等州縣考之郡志亦云外遼羣山中開平壤自古戰守之區論之目前則偏頭寧武地方之要害相為甲乙圖之深遠則代州雁門關隘之緊關尤當注意

雁門守禦千戶所在布政司北三百六十里東至水峪口代州界二十里西至盤道梁堡三十里南至代州界三十里北至廣武城二十里東南到代州治 爾

雅八陵西俞雁門是也

郭璞曰即雁門山

山海經雁門者雁

飛出於其間 呂氏春秋雁門九塞之一 五朝志

雁門有關官有長城有纍頭山有夏屋山 通典雁

門郡南二十里有東陁關甚險固 唐志雁門有東

陁關西陁關 宋志雁門有西陁胡谷雁門三砦

金志雁門有夏屋山雁門山滹沱水鎮三雁門西陁

胡谷 趙武靈王北畧中山至於房子遂之代北至

無窮登黃華之上召樓緩謀彊兵 趙將李牧常居

代雁門備邊以便宜置吏市租皆輸入幕府為士卒

費日擊數牛饗士習騎射謹烽火多間諜約曰寇即入盜即入收保有敢捕虜者斬寇每入烽火謹輒入收保不敢戰如是數歲亦不亡失然寇以牧為怯趙王讓之牧如故乃使他人代將出戰數不利復請牧牧曰王必用臣臣如前乃敢奉令王許之牧至如故約邊士日得賞賜而不用皆願一戰於是乃具選車得千三百乘選騎得萬三千匹百金之士五萬人悉勒習戰大縱畜牧人民滿野寇小入佯北不勝以數

千人委之寇大率衆來入牧多為奇陣張左右翼擊大破之殺十餘萬騎滅襜褕破東胡降林胡單于奔走其後十餘歲不敢近趙塞 漢元光元年十一月中尉程不識為車騎將軍屯雁門 五年發卒萬人治雁門阻險 六年遣驍騎將軍李廣出雁門失道而還 元朔元年三月寇入雁門敗都尉殺畧三千餘人遣將軍衛青出雁門獲首虜數千級 北齊河清二年周師及突厥至并州望齊軍營甚整突厥咎

周人曰爾言齊亂故來伐之今齊人眼中亦有鐵何
可當耶乃還至陘嶺凍滑鋪羶以度馬寒瘦膝已下
皆無毛比至長城死且盡截稍杖之以歸 隋大業
十三年雁門丞陳孝意奔還雁門雁門人殺之以城
歸劉武周 唐大曆十三年回紇襲振武攻東陘入
寇太原河東節度使鮑防與戰於陽曲敗績代州都
督張光晟又戰於羊虎谷破之寇乃去 宋宣和七
年十二月金尼瑪哈由雁門趨太原所過皆陷 明

景泰元年刑部右侍郎江濶督修雁門關 雁門關

巡檢司

國朝雍正四年設

廣武城在布政司北三百八十里東至茹越口堡九十
五里西至朔平府馬邑縣界二十里南至代州六十
里北至大同府應州界十里 雁門關守備初駐代
州嘉靖二十三年移駐廣武城 廣武西二十里至
太和嶺太和二十里至水勤口水勤二十里至弔橋

嶺吊橋三十里至廟嶺廟嶺三十五里至石匣口石匣
十里至陽武峪陽武二十里至元岡口元岡三十里
接寧武關之蘆板寨 廣武東十五里至水峪口水
峪三十里至胡峪口胡峪二十里至馬蘭口馬蘭三
十里至茹越口茹越三十里至小石口小石十里至
大石口大石四十里至北樓北樓五十里至太安嶺
太安五十里至團城口團城五十里接平刑關之平
刑嶺 廣武城東橫背嶺又東為葫蘆口又東為凌

雲口又東為水峪口廣武城西為太和口又西為白
草口又西為八岔口廣武墩南十三里至雁門北
口北口十里至雁塔雁塔十里至南口南口十里至
代廣武北傳烽渾源州繇山南孤山墩應州繇山
南羊腦墩山陰縣繇山南圪塔墩而傳崞忻州北則
繇蘆板東則繇代柏林崖至班聶三關志廣武當
朔州馬邑大川之衝通忻代崞峙諸郡縣之要道凡
由大同左右衛而入勢當首犯東越廣武則北樓平

刑皆敵衝也西越白草溝則夾柳樹鵬窩梁皆要害也雁門警備於是為急嘉靖二十一年七月俺答糾青台吉呢刺哈哈刺漢及叛人高懷智李天章等寇廣武南掠太原抵平陽韓信嶺乃還

白草溝 勾注山在州西北二十五里一名西陘上為太和嶺後為白草溝即廣武舊站通雲中 史記正

義代州雁門縣有勾注山 勾注徑勾注山之仄漢高帝自晉陽至平城繇此越代谷 水經注陘山南

北有長嶺嶺上東西有通道即鉗鐙也 魏勾注碑

北方之險有盧龍飛狐勾注為之首 括地志勾注

山一名西陁山夏屋山一名賈屋山在雁門縣 蘇

厲遺趙王書秦反罔分先俞於趙徐廣曰爾雅曰西

俞雁門是也正義曰罔音邢分字誤當作山字括地

志云勾注山一名西陁山在代州雁門縣西北四十

里俞音戍郭注云西陁即雁門山也按西先聲相近

蓋陁山西陁二山之地並在代州雁門縣皆趙地也

穆天子傳北巡至於鉞山之隊東升三道之陞獵於
山北大風雨雪作黃竹之詩以歸 金志縣有西陁
鎮

廣武故城州西十五里陁口之南即漢械繫婁敬地

廣武城在馬邑縣南八十里韓王信與匈奴屯廣武
以南漢兵大破之即此漢為縣屬太原郡 雁門廢
縣州西北四十里即漢廣武縣隋改雁門有東西陁
二關今廢 漢平城廢縣在雁門縣之西 括地志廣

武故城在代州雁門縣勾注山南四十五里 通典

廣武縣故城在雁門縣西南有勾注山一名西陘山

舊唐志漢廣武縣隋為雁門縣 明一統志廣武

故城在代州西一十五里 漢營陰館即今治魏徙

雁門治廣武今州西故城尋還陰館營上館城 漢

高帝七年十月右賢王將萬餘騎與王黃等屯廣武

以南寇晉陽將軍周勃酈商夏侯嬰破之追至離石

定雁門樓煩諸縣夏侯嬰三陷陣 漢文帝後四年

寇大入雲中代屯勾注後五年寇三萬騎入雲中故
楚相蘇意為將軍屯勾注 應劭曰山險名也在雁
門陰館 魏牽招為雁門太守鮮卑步度根泄歸泥
等將部落三萬附塞招自將歸泥等討軻比於雲中
故郡大破之招通河西鮮卑附頭等十餘萬家繕治
陁北故上館城置屯戍以鎮內外 晉咸和三年趙
石虎以五千騎伐代代王紇那戰於勾注敗績奔大
甯 元魏皇始元年八月自將兵四十萬南出馬邑

踰勾注燕并州牧遼西王農棄城遁并土悉降武
定元年八月齊獻武召夫五萬於肆州北山築城西
自馬陵戍東自土陞四十日罷周保定四年正月
伐齊元帥楊忠以突厥衆壞齊長城而入席卷三十
餘鎮齊人守陁嶺之隘忠擊破之留其裨將楊纂屯
靈邱以為後拒而自以兵攻晉陽不利引還纂亦解
歸隋大業十一年八月北巡始畢勒騎四十萬謀
來襲義成公主遣使告變乃疾馳至雁門始畢兵亦

至圍雁門城中兵民十五萬食止支二旬諸屬城皆
破惟崞城守始畢急攻雁門矢及御前蕭瑀請諭將
士不復東征高麗厚為賞格且使人於義成公主以
詔書繫木浮水以出徵兵從之九月唐公李淵子世
民應募說屯衛將軍雲定興曰始畢以我倉卒不能
赴援宜晝引旌旗夜鳴鉦鼓必謂我救兵大至不戰
遁矣定興從之會義成公主亦使使告始畢曰北邊
有急乃解圍去遂入樓煩關以還 按魏徙雁門郡

治廣武今廣武廢縣也郡尋還陰館隋開皇五年改
廣武曰雁門縣即魏所徙郡治今廣武舊站也 唐
武德二年始畢可汗佐劉武周以五百騎入勾注

宋太平興國五年三月契丹十萬騎入雁門代州刺
使楊業率麾下數百騎自西陁出由小徑至雁門北
口南向背擊之大破契丹殺其節度使駙馬侍中蕭
多囉自是見業旌旗輒引去 雍熙三年三月都部
署潘美自西陁入與契丹兵遇追至寰州破之神衛

軍都校薛超從潘美北征至雁門西陁路與遼師遇
敗之斬首五百餘級超連被創血濡甲縷部分軍士
自若 熙寧七年沿邊增修戍壘起舖舍雁門以
北稍侵入蔚應朔三州界遼遣使來言疆事詔太常
少卿劉忬境上會議八年春遼使蕭禧來會於大黃
平議不能決初遼指蔚朔應分水嶺土隴為界及行
視無土隴乃曰但以分水嶺為界凡山皆有分水無
可指據遼復遣蕭禧來致圖書詔知開封府韓縝代

怵復遣使知制誥沈括先報聘括詣樞密院閱故牘
得頃歲所議疆事書指石長城為界去今所爭黃嵬
山三十餘里言之帝喜曰大臣殊不究本末幾誤國
事括至遼遼相楊益戒來就議括得地訟之籍數十
以應之遼知不可奪遂舍黃嵬而以天池請括還王
安石進曰將欲取之必固與之於是詔鎮割界遼東
西失地凡七百餘里其後遼復包取兩不耕地下臨
雁門遂起用兵之釁時提點河東刑獄蔡廉上言不

可失要險起寇心不聽 兩鎮三關志北方之險盧
龍飛狐勾注為之首宋之立國不競於岐溝之戰未
能復盧龍不勝於陳家谷之師未能復飛狐茲又無
名捐此不能全勾注譬之防川堤障悉淪何以遠溺
故嘗曰宋之南渡不在於汴京之括金而在於分水
嶺之畫界宋之遂亡不在於瓊崖之覆舟而在於襄
鄧之失守 尹耕宋割分水嶺論夫地險有二山水
是也水險主客共之山險主可專利宋人所割分水

嶺之地今不可考然嘗登雁門踰夏屋極目於勾注
廣武之間而知陁山形如人字一脊中分山南據脊
則利歸山南山北據脊則利歸山北遼人所以拳拳
於此也 金朔州鄯陽縣有桑乾河太和嶺天池雁
門關霸德山而代州雁門縣有夏屋山雁門山有雁
門西陁胡谷鎮是雁門勾注之險分隸朔代元破野
狐嶺軍所以易於長驅深入也 元戊寅穆呼哩自
西陁由太和嶺入河東攻太原忻代澤潞汾霍等州

悉降之遂徇平陽 金興定二年八月己酉元遣穆
呼哩等帥步騎數萬自太和嶺徇河東乙卯收代州
已卯十月復由雲中歷太和寨入葭州 元大德五
年興屯田於太和嶺之間分山陰雁門馬邑鄯陽洪
濟金城寧武七屯 韓安國曰孝文帝嘗擁天下之
精兵聚之廣武常谿 三關志雁門郡治廣武井水
鹹苦民擔輦遠汲往返七里漢建興四年魏雁門太
守牽招準望地勢因山陵之宜開廣武渠注水城內

甚得其濟

峪口州南東西二峩之中南入五臺界 峩嶺曲徑通
微盤折而上越嶺復盤折而下五里至五臺白崖村
峩口州東南六十里接繁峙界有峩口寨堡 西二十
有黑山寨堡

水峪口廣武站東十五里 翁萬達疏自水峪鴉兒崖
起東至馬蘭口霍家坡止為垣五十三里有奇增添
敵臺九十六鋪屋二百八十八品窖五萬四千八百

胡峪口水峪口東三十里

葫蘆口廣武橫嶺背東 橫嶺盤道勢最糾結故明時

垣工最詳

凌雲口葫蘆口東北少東南至水峪口 翁萬達疏自

凌雲口菜樹溝起至大安口閻家嶺止為垣四十五

五里有奇石塹三十之一增添敵臺一十八舖屋五

十四自凌雲口黃沙坡起東至大安嶺盡境及葫蘆

頭橫牆地止為垣二十丈五尺削崖垣二里有奇增

添敵臺五十四舖屋一百二十六品窖六千九百二十四

馬蘭口凌雲口少西北錯繁峙應州界 翁萬達疏自

霍家坡起東至凌雲口黃沙坡止為垣四十里有奇
增添敵臺八十一舖屋二百四十三品窖七千九百

七里堡西七里 馬站堡西十五里 古城堡西十五

里 八里堡西二十里 窰子頭堡西二十里 陽

明堡西二十二里 茹解堡西三十里 平城堡東

五里 二十里鋪堡東二十里 門王堡東二十里
聶營村堡東三十里 下社村堡東四十里 梨
園堡南七里 下田堡西北七里 上田堡西北十
五里 花家村堡西北二十里 宇文堡西北二十
里 常河堡西北二十里 官園堡西北三十里
磨方堡東北十五里 薄村堡東北十五里 赤土
堡東北二十里 馬村堡東北三十里 三家村堡
東北四十里 望台堡東北四十里 鹿蹄澗堡東

北四十里 胡峪堡東北六十里 高村堡東南八

里 金盤村堡東南十里 選仁村堡東南十五里

下庄村堡東南十五里 東帳村堡東南二十里

黑山庄堡東南四十里 堡子土堡西南十五里

趙村堡西南二十里 徐村堡西南二十里 閻村

堡西南二十五里 白水堡西南十七里 下茹解

堡西南三十里

五臺縣

石盆口縣東十五里為茹村繇茹村而東至石盆洞口繇石盆洞口入東北一谷為上峪袤四十五里路通高洪口臺懷鎮射虎川長城嶺繇石盆口南為下峪一水中流兩山夾岸路南通牛道嶺東南通黑山關石盆口東山有柏寨有石盆溝北漢天會十一年三月招收指揮使閻章以石盆砦詣宋鎮州降

高洪口東南七十里南連石佛口北接大峪口路通阜平縣關口山明洪武九年置巡檢司上峪北山下

為河口村虎陽河清水河匯此又上為高洪口又渡
河北至松巖村入峪四十五里至是少平 高洪口
巡檢司今寓城中

長城嶺由高洪口沿河至石嘴村北進則臺懷鎮又繇
石嘴北上過紅崖為射虎川又北鐵舖村過盧家莊
子東上二里至長城嶺直隸龍泉關界 龍泉關東
臺東南六十里

大峪口東北五十里福勝都東通阜平縣西通崞縣北

通繁峙縣明永樂八年置巡檢司今裁 縣東北四十里為竇村鎮繇鎮東少北至南道頭又東至大峪口又東北至香城溝夾道山泉多虎豹又盤山而入至繁峙縣界西瓦梁

飯仙口東北一百二十里明永樂九年置巡檢司今裁西南二十里有狐野口又西北二十里有趙勝口石佛谷東南五十里百蘭都

黑山東南九十里接平山縣界山東為黑山關 小峪

兩山夾水一日度河者數十至耿家莊蓮花盆東入
一谷翳林飛瀑為懸鐘堂又過砂崖呂家莊至黑山
關自黑山關下抵縣城百里澗山行水流逶曲即
東峪溝也 油盆池在黑山下

摩天寨東北九十里峭壁插天高二十餘里上平地數
頃可馳射 摩雲山 唐末蒲絳民避亂五臺壁摩
雲山羣賊往攻不克李罕之以百人攻拔之衆號李
摩雲

曹寨南七十餘里峻峭拔起四面石壁渟沱繞其下
國朝順治六年姜賊據之總兵李延壽募壯士登寨軍
中夜先擊鼓以亂賊之聽乃鑿石下鐵椎如猿猱攀
援而上賊不為備遂破

竇村鎮

國朝順治六年姜黨穴竇村鎮宣府總兵李延壽聲言
牧馬代州刻期繇峩口進兵出賊不意夜驟馬竇村
賊驚遁縱擊無一脫者五臺圍解

臺懷鎮康熙五十二年設營墩汎三隸縣地餘隸繁峙
金剛庫康熙五十二年設營墩汎四

水月堂寨東北七十里上如覆甑下如壁立 元黃寨

豆村山東山高峻 揚武寨東四十里險峻 孤髻

寨南三十里 狐突寨南四十里 槐陰堡立崖上

東冶堡 東峽堡 高家莊堡 檣頭堡 建安

堡 河邊堡 兩澗堡 泉巖堡 郭家寨堡

繁峙縣

茹越口堡北六十里明正統十年築在布政司東北九
十三里東至小石口堡二十里西至廣武城南至繁
峙縣六十里北至大同府應州四十里 應州南三
十里為茹越北口龍灣山南四十里為茹越北口

宋志有繁峙茹越大石義興治寶興軍瓶形梅回麻
谷八砦 金志繁峙縣有茹越鎮 後唐末詔應州

修茹越口 遼以雲州為西京則茹越之路自通

明正統十四年九月瓦剌繇茹越口入掠忻崞繁峙

五臺

小石口堡東北八十里明正德十一年築在布政司東北四百一十里東至北樓城三十里西至茹越口堡二十里南至繁峙縣四十里北至大同府靈邱縣界二十里 應州東南三十里大石口同 小石峪北二里有大石峪水隸應州小石峪有小石峪水隸應州

大石口堡東北八十里明正德十一年築 宋端拱元

年遼人自大石路南侵知代州張齊賢預簡廂兵千人為二部分屯繁峙崞縣下令曰代西有寇則崞縣之師應之代東有寇則繁峙之師應之比接戰則郡兵集矣至是果為繁峙兵所敗 宋張耆言契丹雲應蔚朔四郡間遣人以文移至并代非觀邊虛實即欲察識道路宜密諭代州自雲應蔚至者繇大石口入自朔至者繇土陞入餘間路塞之以示險 金志繁峙縣有大石鎮

北樓口城東北一百一十里布政司東北四百二十里
東至平刑關六十里西至小石口堡三十里南至繁
峙縣界四十里北至大同府廣昌縣界二十里 明
正德十一年城北樓諸堡凡十有一并設北樓倉

北樓北口在應州東南四十里 北樓口南通朗嶺
關 嘉靖二十三年置游擊將軍別為營駐北樓口

三關叅將守備分駐北樓口各一員 唐武德七
年顏利願欵北樓關請互市上不之拒 胡松蒼翟

中丞書雁門守備雖帶管其地然設在代州勢難遙
制且代城甚堅其中固有代州振武衛與按察分司
自足捍禦宜改置北樓口使備東十隘 王家屏三
邊修守記甃二城北樓廣武增築土堡六古計砂澗
福連房大營屯黑圪塔中莊

朗嶺關

舊名狼嶺

東一百里應州南四十里路通應州界振

武衛守備關下有馬跑泉

平刑關東一百三十里路通靈邱縣 一名瓶形雁門

關東二百三十五里路通靈邱縣西北連渾源州大
寨口南接正定府阜平縣界 平刑營在布政司東
北五百里東至直隸阜平縣界三十里西至繁峙縣
一百三十里南至直隸阜平縣界十八里北至大同
府渾源州一百二十里 大寨頭關在渾源州西南
一百一十里 明設守備一員百戶一員征搦馬軍
五百名守堡旗軍一百八十四名 金志繁峙縣有
瓶形鎮 宣府鎮摘兵三千在平刑關駐劄專應援

吳王口別鎮兵三千在廣昌縣駐劄專應援浮圖峪
插箭嶺等處 嘉靖二十三年巡撫都御史曾銑議
大城雁門長城自老營了角山至平刑關東八百餘
里 楊博據要害疏大同則當守渾源靈邱廣昌銀
釵驛馬等嶺協同保定鎮巡固守紫荆倒馬馬水口
等處使不能越關而南山山西則當守陽方神池老營
堡偏關等處使不能越關而西其五臺繁峙平刑設
在關外尤當一體戒嚴 明設平刑軍站去砂澗驛

太白驛各七十里

平刑關巡檢司雍正九年巡撫石麟題請繁峙縣平

刑關距縣治一百三十里路通直隸深山曲徑甚屬

險要應裁平刑倉大使設平刑關巡檢專司巡緝兼

理倉務

馬蘭口西北六十里代州應州界翁萬達疏自馬蘭

峪起東至平刑關止為垣三十九里塹十之一增添

敵臺五鋪屋十五品窖一萬六千九百四十五

車道場口北樓營迤東南

太安嶺北樓城迤東東至鷓子澗溝十五里迤東接平
刑營汎南至大營堡三十二里西至下角峪石罅嘴
三十里迤西接北樓營汎北至石罅嘴二里迤北接
渾源營汎 翁萬達疏自太安嶺起東至平刑關三
嶺子盡境止為垣七十三丈增添敵臺八十九鋪屋
一百六十七品窖一萬四千七百四十八

臺懷鎮大名烟西六十里至峩口接代州東路汎 獅

子窩東至金閣嶺墩接五臺縣地

東城嶺在縣西南

峩嶺東南五十里越嶺至五臺大柏舖

西瓦廠村縣南五臺界繇東瓦廠村上金嶺入臺山

故縣堡 三泉堡 砂澗堡 太白堡 楊興堡

崞縣

夾柳樹堡西北六十里明正德十一年築 盤道口宋

土墜砦宋志崞有蘆板陽武石峽土墜四砦 張耆

言契丹文移自朔至者宜繇土陞入以示險 唐武
德中上問劉世讓以備邊策答曰突厥數南寇者恃
有馬邑為地耳如使勇將屯崞城厚儲金帛以招降
者數出奇兵畧城下踐禾稼不踰歲馬邑可圖也上
曰非公無可任者乃使馳驛經畧於是世讓至馬邑
高滿政以地來降 宋雍熙三年十二月代州副部
署盧漢贊敗契丹於土陞堡 雍熙中代州楊業戰
沒上訪近臣以策齊賢請行即授給事中知代州與

部署潘美同領緣邊兵馬是時遼兵自胡谷入寇薄城下神衛都校馬正以所部列南門外衆寡不敵副部署盧漢贊畏懦保壁自固齊賢選廂軍二千出正之右誓衆慷慨一以當百遼衆遂却先是約潘美以并師來會戰無何間使為遼人所得齊賢以師期既漏且虞美衆為遼所乘既而美使至云師出并州至北井得密詔東師敗績於君子館并之全軍不許出戰已還州矣於是遼兵塞川齊賢曰賊知美之來而

不知美之退乃閉其使密室中夜發兵二百人持一
幟負一束芻距州城西南三十里列幟燃芻遼兵遙
見火光中有旗幟意謂并師至矣駭而北走齊賢先
伏土兵二千於土陞砦掩擊大敗之擒其北大王之
子一人帳前舍利一人斬首百級獲馬二千器甲甚
衆翁萬達疏自夾柳樹西界小西溝起東至水峪
口鴉兒崖止為垣十五里增添敵臺一百鋪屋三百
盤道口堡布政司北三百七十里東至雁門所三

十里西至陽方口堡六十里南至崞縣七十里北至朔州六十里

陽武峪西南六十五里 陽武堡有楊六郎寨 秦太

子扶蘇軍於此有太子崖 唐大曆十三年代州都

督張光晟擊敗回紇於陽武峪 後唐清泰三年遼

太宗繇陽武峪入雁門抵太原敗唐兵 宋都巡檢

使楊延昭守陽武峪驍勇善戰遼人憚之時部將孟

良焦贊同守焉 嘉靖二十年七月俺答由左衛猪

兒窰入掠馬邑朔州遂入陽武峪抵太原 明正德

間崞縣閻俊自陽武峪抵寧武關沿山鑿石架橋

宋左拾遺張齊賢疏自河東初下臣知忻州捕得遼
納米典史皆云自山後轉盤以授河東以臣料遼能
自備軍食則於太原非不盡力然終為我有者力不
足也河東初平人心未固嵐憲忻代未有軍砦入寇
則田牧頓失擾邊則守備可虞及國家守要害增壁
壘左控右扼疆事甚嚴恩信已行民心已定乃於雁

門陽武峪來爭小利此其智力可料而知也 陽武

峪巡檢司縣西七十里

石佛谷

石佛峪口

西三十里北接朔州界元末用石壘寨明

因之南通廟嶺其西北有郎嶺關明洪武七年千戶

王原築 郎嶺口在西北四十里 雁門有東陁西

陁之險崞縣有陽武石門之險 朔州西南七十里

翠峯山東連石碣峪 唐志崞有石門

註石門關即今崞城也

蘆板口西南六十里明時傳烽崞縣繇蘆板始 金志

崞鎮一蘆板 蘆板寨巡檢司明設今裁

鵬窩梁口北八十里 胡松答翟中丞書五寨堡遠距
偏頭寧武二關幾可二百里許敵小至要不敢深至
其域大舉則將自保不暇是亦無用之贅員也莫若
移五寨守備於夾柳鵬窩梁之間使守西隘八口

蓮花口堡明正德十一年築 蓮花口西為盤道梁界
嘉靖二十年七月俺答繇小蓮花口火燒溝入繇

山頂牛心寺宋家溝白九川廟嶺梁南下是月復繇

此口出 牛心寺口北五十里 宋家溝口北五十里 白九川口西北四十五里 廟嶺梁西三十里 王野梁口北五十五里此與夾柳樹路相通明嘉靖後修內邊首及王野梁

八岔口堡明正德十一年八月提督都御史李鉞經畧關東西隘口各築堡置官守之八岔小蓮花於是創築堡焉

弔橋嶺北二十里上有秦王寨 弔橋嶺巡檢司後改

入石嶺關隸陽曲縣

元岡口堡西南八十里 有孟良城址存堡南十里有

焦贊寨

石匣口西北四十五里

平山梁口西北三十五里

燕兒水口北六十里

羅漢洞口西南七十里 胡松答翟中丞書代朔崢峙

之間土名魚兒川等處地頗曠衍截長補短方可數

千頃許比緣四方亡命逋逃於此俱治有屋廬伏藏
間謀至難詰禁又斬伐山木日相吞食宜擇為衆所
推者使為保長總小甲以管轄之防秋則授之器甲
令擺邊

唐林崗南五十里南北通衢三關要道

上陽武西四十里 咸陽西北二十里 清安堡北三

十里 段家堡 南高堡 朔寧堡 榆灣堡 焦

家堡 西莊堡 神山堡 橋溝堡 茹莊堡 天

寧堡 大常堡 懷化堡 辛莊堡 半址堡 雙

山堡 南賈堡 上封堡 同樂堡 貴茹堡 崇

仁堡 橫道堡 白石堡 班聶堡 天涯寨 茹


岳堡 天家堡 天元堡

以上土堡

原平堡 清安堡

清和堡

以上
甄堡



山西通志卷十五